


土岐文庫
文庫17
W82
3



文庫 17
W82
3

昭和六十年二月一日贈
土岐善吉唐氏寄

010165188294

宛陵詩鈔

七

梅堯臣字聖俞人稱宛陵先生宣州宣城人以從父蔭
補太廟齋郎歷主簿縣令監稅湖州簽署忠武鎮安兩
軍節度判官初大臣屢薦宜在館閣嘗一召試賜進士
出身餘輒不報嘉祐初學士趙槩等十餘人列言于朝
乃得國子監直講累官至尚書屯田都官員外郎撰唐
載二十六卷多補正乃命編修唐書書成未奏而卒聖
俞少卽以能詩名天下求者踵至其初喜爲清麗閑肆
平淡久則涵演澁遠間亦琢剝以出怪巧然氣完力餘
益老以勁其應於人者多故辭非一體非如唐諸子號
詩人者僻固而狹陋也在河南時王晦叔見而歎曰二
百年無此作矣賢士大夫如溫公東坡介甫諸人咸敬



重之尤與歐陽文忠公善世比之韓孟兩公亦頗以自
况故貢奎詩云詩還二百年來作身死三千里外官知
已若論歐永叔退之猶自愧郊寒蓋言詩力也又龔嘯
云去浮靡之習于昆體極弊之際存古淡之道于諸大
家未起之先此所以為梅都官詩也果信

河陽秋夕夢與永叔遊嵩避雨於峻極院賦詩及覺
猶能憶記俄而僕夫自洛來云永叔諸君陪希深
祠岳因足成短韻

夕寢北窗下青山夢與尋相歡不異昔勝事却疑今風雨
幽林靜雲烟古寺深

此二句
夢中得

攬衣方有感還喜問來音

希深惠書言與師魯子聰永叔幾道遊嵩因誦而韻

之

聞君奉宸詔瑞祝疑靈岫山水聊得游志願庶可就豈無
朋從俱况此一二秀方靳建春陌十刻殘晝漏初經緱氏
嶺古栢尚鬱茂却過轅轅關巨石相撐鬪夕齋禮神祠法
袞被藻繡畢事登山椒常服更短後從者十數人輕齋不
為陋是時天清陰力氣勇奔驟雲巖杳虧蔽花草藏澗竇
傍林有珍禽驚聒若避殼盤石暫憩休泓泉助吞漱上窺
玉女窗漸絕非可構下玩搗衣砧焜耀金紋透尹子體雄
恢攀緣逾習狃歐陽稱壯齡疲軟屢顛踣競歡相扶持芒
屨資踐蹂入仙存故壇三醉孰云謬鄙哉封祝碑數子昔
鐫鏤偶誌一時事曷虞來者詬絕頂瞰諸峰隘然輕宇宙
遙思謝塵煩欲知羣鳥獸韓公傳石室聞之固已舊當時
興稍衰不暇苦尋究東崖暗壑中釋子持經呪于今二十

年飲食同猿狖君子聆法音充爾溢膚腠嘗期躡屐過
齊色先愀韻叶遂乖真諦言茲亦甘自咎中預會幾望涼蟾
皓如畫紛紛坐談譚草草具觴豆清露濕中裳誰人苦羸
瘦便卽忘形骸胡爲戀纓綬或疑桂宮近斯語豈狂脊歸
來遊少室峭崿殊引脰石室迢遞過探訪仍邂逅捫蘿上
岑邃仙屋何廣袤乳水出其間涓涓自成溜凡骨此熏蒸
靈真安可覲霞壁幾千尋四字伴篆籀咸意苔蘚文誠爲
造化授標之神清洞民俗未嘗遘忽覺風雨冥無能久瞻
扣忽忽遂宵征勝事皆可復俚歌縱喧譁怪說多駁糅凌
晨關塞陽追賞顏匪厚窮極四百里寧憚疲左右昨朝書
報予聞甚醉醇耐所嗟遊遠方心焉倍加疚

送河清賈主簿歸任

不遠水雲間悠悠泝鷁還分亭接鷄犬舉酒對河山殘雪
依荒磧寒烟入暝灣昔人鸞枳歎一併在離顏

河南張應之東齋

昔我居此時鑿池通竹圃池清少游魚林淺無棲羽至今
寒窗風靜送枯荷雨雨歇吏人稀知君獨吟苦

河南王尉西齋

官舍古城隅西齋何寂寂種竹幽趣深開屏翠光滴青山
露南墻落日明東壁危臺起其傍平隰坐可覲歲暮野田
空天高霜隼擊更憐風月時幾弄林間笛

余居御橋南夜聞秋鳥鳴効昌黎體

都城夜半陰雲黑忽聞轉轂聲咿啾嘗憶楚鄉有秋鳥一
身九首如贅疣或時月暗過閭里緩音低語若有求小兒

藏頭婦滅火閉門鷄犬不爾留我問楚俗何苦爾云是鬼
車載鬼遊鬼車載鬼奚所及抽人之筋繫車軸昔聽此言
未能信欲訪上天終無由今來中土百物正安能遂與南
方儔上帝因風如可達願令驅逐出九州

僧可真東歸因謁范蘇州

仲淹

姑蘇臺畔去雲壑付清機野策過寒水山童護衲衣松門
正投宿竹笠帶餘暉誰愛杼山句使君應姓韋

魏屯田知楚州

淮南水葉驚淮上使君行天外高帆出沙頭候吏迎夜潮
通廢埭秋月滿孤城正遲文翁化從來楚俗輕

和才叔岸傍古廟

樹老垂纓亂祠荒向水開偶人經雨踏古屋爲風摧野鳥

棲塵坐漁郎莫竹杯欲傳山鬼曲無奈楚辭哀

新安錢學士以近詩一軸見貺輒成短言用叙單悃

早事太尉府謬以才見論身作邑中吏日陪丞相尊嵩山
雲外寺伊水渡頭村泉味入香茗松色開清罇題詩人半
醉馬上景已昏歸來屬後乘冠蓋迎國門悠悠失貧賤苒
苒歷涼溫而今處窮僻落莫思舊恩終日自鮮適終年長
不言已覺人事寡惟聞鷄犬喧東風有來信滿幅蘭與蓀
深知故人意遺我滌冥煩一章言罨畫谿好如目存何須
到雲壑便若游花源一一先造化可以輕瑤琨成誦今在
口願將醒病魂

彼鴛吟

斷木喙雖長不啄栢與松松栢本堅直中心無蠹蟲廣庭

木云美不與松栢比臃腫質性虛朽竭招猛虜主人赫然
怒我愛爾何毀彈射出窮山羣鳥亦相喜啁啾弄好音自
謂得天理哀哉彼鴛鴦吻血徒爲爾鷹鷂不搏擊狐兔縱
橫起况茲樹腹怠力去宜濱死

陶者

陶盡門前土屋上無片瓦十指不霑泥鱗鱗居大厦

禽言四首

子規

不如歸去春山云暮萬木兮參雲蜀天兮何處人言有翼
可歸飛安用空啼向高樹

提壺

提壺蘆沽美酒風爲賓樹爲友山花綠亂目前開勸爾今

朝千萬壽

山鳥

婆餅焦兒不食爾父向何之爾母山頭化爲石山頭化石
可奈何遂作微禽啼不息

竹鷄

泥滑滑苦竹岡雨蕭蕭馬上郎馬蹄凌兢雨又急此鳥爲
君應斷腸

弔礦坑惠燈上人

生棲雲際爍沒葬寺傍村破案殘經卷新墳出樹根松悲
隔溪路月照舊山門自昔多詩句而今幾許存

范饒州坐中客語食河豚魚

春洲生菰芽春岸飛楊花河豚當是時貴不數魚鰕其狀

已可怪其毒亦莫加忿腹若封豕怒目猶吳蛙庖煎苟失
所入喉爲鏢鉞若此喪軀體何須資齒牙持問南方人黨
護復矜誇皆言美無度誰謂死如麻吾語不能屈自思空
咄嗟退之來潮陽始憚養籠蛇子厚居柳州而甘食蝦蟆
二物雖可憎性命無舛差斯味曾不比中藏禍無涯甚美
惡亦稱此言誠可嘉

和元輿遊春次用其韻

乘閑多遠興信馬與君行碧樹斜通市清流曲抱城山花
高下色春鳥短長聲日暮吾廬近還歌空復情

離蕪湖至觀頭橋

江口泊來久菰蒲長舊苗爭鷓洲鵲鬪遺子浦魚跳宿岸
欣逢戍歸船競趁潮時時望鄉樹已恨白雲遙

夢故府錢公

故相方來夢分明接座隅只知冠劍是不道死生殊西府
看如舊東山詠久徂遽然典寤歎不覺淚霑鬚

宿州河亭書事

遠泛千里舟暫向郊亭泊觀物趣無窮適情吟有託林中
鷓舅獐席上蠅虎攫雨久草苗盛田蕪瓜蔓弱香粳稚子
慣脫粟家人薄少年都下來聊問時所作新衣尚穿東舊
服變褒博我今貧且賤短褐隨宜著

晚泊觀鬪鷄

舟子抱雞來雄雄踣高岸側行初取勢俯啄示無憚先鳴
氣益振奮擊心非悞勇頸毛逆張怒目背裂肝血流何所
爭死鬪欲充玩應當激猛毅豈獨專晨旦勝酒人自私粒

食誰爾喚紉懷彼興魏傍睨當裝漢徒然驅國衆曾靡救
時難羣雄自苦戰九錫邀平亂寶玉歸大姦于戈託奇算
從來小資大聊用一長歎

廟子灣辭

廟子灣風俗云有白龍憑險日爲波潮以驚異上下余
過而作辭云

我之東來兮過彼雍丘舟師奏功兮濁水湍流歷長灣兮
勢曲鉤傾高斗折兮若奔虬潛伏怪物兮深幽幽發作暴
漲兮爲潮頭土人立祠兮在彼沙洲老木蒼蒼兮蟬與啾
啾輪卒引緯兮蓬首裸體劇縲囚赤日上煎兮膠津感氣
塞咽喉曾盪肩挨同軛牛足進復退不得休竟持紙幣挂
廟陬微風飄揚如喜收我今語神神聽不何不歸海事陽
侯穹魚大龜非爾儔奚必區區此汴溝驚愚駭俗得有羞
去就當決何遲留

送馬廷評之餘姚

越鄉知勝楚君去莫辭遙曉日魚蝦市新霜橘柚橋河流
通海道山井應江湖近邑逢鷗鳥先應避畫橈

送張子野祕丞知鹿邑

忽作五年別相逢雙鬢疎不知從此去當見復何如公秣
時爲酒晨庖日有魚沛譙風物美聊以樂琴書

依韻和劉敞秀才

安得采虛名師道欲吾廣雖然存術業曾不計少長孔孟
久已亡富貴得亦儻後生不聞義前輩懼爲黨退之昔獨
傳力振功不賞舌吻張洪鍾小大扣必響近世復泯滅務

學多忽恍今子誠有志方駕已屢枉自慙懷道淺所得可
下上正如種青松而欲託朽壤典冊皆可尋聖言皆可仰
幸無增我過此語固不爽

送張秀才之淮南

聊爲楚客唱一送淮南行出汴遠心喜移舟孤岫橫危帆
將進浦寒霧不分城枚乘舊居處向來秋草生

南隣蕭寺丞夜訪別

憶昨偶相親相親如舊友雖言我巷殊正住君家後壁裏
射燈光籬根分井口來邀食有魚屢過貧無酒明日定徂
征聊茲酌升斗宵長莫惜醉路遠空迴首

讀司馬季主傳贈何山人

長安新雨後九陌少行人同輿有宋賈游市懷隱淪日聞

古賢哲必與醫卜隣來過季主室再拜語遂巡矍然悟辭
貌何爲居埃塵捧腹乃大笑吾道非爾臻驥慙罷驢駟鳳
豈燕雀親筮占聊助上功利儻及民大夫與博士登車若
喪神今我見何遜始驗太史真順性誨善惡不離義與仁
言孝諭爲子言忠諭爲臣又得蜀嚴比寧將日者均京都
盛龜策坐肆如魚鱗噤口不正言唯能辨冬春鴻冥復所
慕安得鷄鶩馴

依韻和子聰見寄

嘗念餞行舟風蟬動去愁獨登孤岸立不見遠帆收及送
故人盡亦嗟歸迹留洛陽君更憶寧復醉危樓

送何遜山人歸蜀

春風入樹綠童稚望柴扉遠壑杜鵑響前山蜀客歸到家

逢社燕下馬澣征衣終日自臨水應知己息機

新霽望岷筵山

謝紫微坐中賦

北望直百里峩峩千仞青斷虹迎日盡飛雨帶龍腥陰經
煙雲畜陽崖草木靈登臨終不厭時許到茲亭

代書寄歐陽永叔四十韻

始謫夷陵日當居建德年一書寃逐客四詠繼稱賢自謂
臨江徼相逢莫我先白醪封畫榼素鯉養泓泉戒吏收山
粟呼童惜沼蓮只期東浦過共醉小溪邊日日占風勢時
時到水塹安知貪挂席不宥暫迴船自爾皆無定歸歟亦
未然指程幾一月泝險歷三千魚鳥都難問音塵杳莫傳
因之走羸僕試與訪南遷比及過牛峽還聞迎壁田報言
雖不獲吉語喜多全我解歸堯闕君移近漢淵問途曾未

遠命駕亦何緣衰野今行矣隆中有待焉鄉亭瓜接畛風
化蟻同羶卽欲朋簪盍翻爲俗事牽愛嬰嬌啞啞嗜寢復
便便雞黍煩爲具輪轅豈得前寄聲勤以謝幸子怨而憐
來貺誠爲望論情恐未捐嘗親馬南郡果謁謝臨川遂得
窺顏色重忻論簡編聊咨別後著大出篋中篇問傳輕何
學言詩詆鄭箋飄流信窮厄探討愈精專道舊終忘倦評
文欲廢眠寧知主人貴但見左魚懸所至同風月相歡憶
澗灑清歌嗟在耳素髮怪侵顛翠蝶時登眺芳洲屢泝泐
難醒撥醅醪殊厭落頭鮮坐竹聽啼鳥臨流聒嘒蟬孤亭
起歸夢南陌去揚鞭出餞陪雙旆方靳歷廣鄺始生山吏
敬頗釋利途邇會面辭何吐離膺事已填空餘郡樓望野
色際平煙

雪夜留梁推官飲

晝雪落旋消夜雪寒易積燈清古屋淡爐凍殘煙碧爲活
一斗酒暫對千里客酒薄意不淺輕今須重昔重昔是年
華飄飄猶過隙一醉冒風歸平明馬無迹

永叔寄澄心堂紙二幅

昨朝人自東郡來古紙兩軸絨縻開滑如春冰密如繭把
玩驚喜心徘徊蜀牋脆蠹不禁久刻楮薄慢還可哈書言
寄去當寶惜慎勿亂與人剪裁江南李氏有國日百金不
許市一枚澄心堂中唯此物靜几鋪寫無塵埃當時國破
何所有帑藏空竭生莓苔但存圖書及此紙輦大都府非
珍瓊于今已踰六十載弃置大屋墻角堆幅狹不堪作詔
命聊備寵使供鸞臺鸞臺天官或好事持歸祕惜何嫌猜
君今轉遺重增愧無君筆札無君才心煩收拾乏置積日
畏捨裂防嬰孩不忍揮毫徒有思依依還起子山哀

聞尹師魯赴涇州幙

騎 邊來漢兵皆死戰昨聞衛將軍賢俊多所薦知君
慮不淺永對未央殿天子喜有言輶車因召見籌畫當冕
旒袍魚賜銀茜曰臣豈身謀而邀陛下睠青衫出二嶠白
馬如飛電關山冒風露兒女泣霜霰軍容壯士多劔藝匹
夫銜賈誼非俗儒慎無輕寡變

夏日陪提刑彭學士登周襄王故城

聊隨漢使者一上周王城片雨北郊晦殘陽西嶺明野禽
呼自別香草問無名誰復黍離詠但興箕穎情

新霽登周王城

行行古城頭歷覽古城下水鳥傷人煙河流隔桑柘秋山
豁晴翠野老親時稼民訟今已稀閑登厭官舍

田家

高樹蔭柴扉青苔照落暉荷鋤山月上尋徑野煙微老叟
扶童望羸牛帶犢歸燈前飯何有白薤露中肥

田家語

庚辰詔書凡民三丁籍一立校與長號弓箭手用備不
虞主司欲以多媚上急責郡吏郡吏畏不敢辨遂以屬
縣令互搜民口雖老幼不得免上下愁怨天雨淫淫豈
助聖上撫育之意耶因錄田家之言次爲文以俟採詩
者云

誰道田家樂春稅秋未足里胥扣我門日夕苦煎促盛夏
流潦多白水高於屋水既害我菽蝗又食我粟前月詔書
來生齒復板錄三丁籍一壯惡使操弓韜州符今又嚴老
吏持鞭朴搜索稚與艾唯存跛無目田閭敢怨嗟父子各
悲哭南畝焉可事買箭賣牛犢愁氣變久雨鐺缶空無粥
盲跛不能耕死亡在遲速我聞誠所慙徒爾叨君祿却詠
歸去來刈薪向溪谷

汝墳貧女

時再點弓手老幼俱集大雨甚寒道死者百餘人自壞河至昆陽老牛跛僵尸相藉

汝墳貧家女行哭音悽愴自言有老父孤獨無丁壯郡吏
來何暴縣官不敢抗督遣勿稽留龍鍾去攜杖勤勤囑四
隣幸願相依傍適聞閭里歸問訊疑猶強果然寒雨中僵
死壤河上弱質無以託橫尸無以葬生女不如男雖存何
所當拊膺呼蒼天生死將奈向

魯山山行

適與野情愜千山高復低好峰隨處改幽徑獨行迷霜落
熊升樹林空鹿飲溪人家在何許雲外一聲雞

疲馬

疲馬不畏鞭暮途知幾千當須量馬力始得君馬全

依韻和永叔子履冬夕小齋聯句見寄

遙知夜相過對語冷無火險辭鬪尖奇凍地抽筭筭吟成
欲寄誰談極唯思我學術窮後先文字少許可敢將蠡測
海有似脂出輒必餓嘗見憂此病各又果弊駕當還都重
門不須鎖到時春怡怡萬柳枝娜娜定應人折贈只恐絮
已墮行橐且不貧明珠藏百顆永叔嘗見嘲謂自古詩人
率多寒餓顛困屈原行吟
於澤畔蘇武嚼雪於海上杜甫凍餒於秦陽李白窮弱
宣城孟郊盧仝栖栖道路以子之亦必類數子今二君又

自為此態而反有飯顆之謂何耶

仲春同師直至壠山雪中宿穰亭

與子乘羸馬夜投山家宿風雪滿綈裘燈火淡竹屋烹雞
賴主人吠犬憎倦僕明發到巖前春萸凍雲木

和師直早春雪後五壠道中作

來尋谷口春正值陰雲結日暮冰霰繁宿亭孤飯設侵晨
登壠去始見羣峰列草凍未抽心松枯猶抱節川傍認飛
鷲林上墜殘雪何意待芳菲遲留未堪折

孫主簿惠上黨寺壁胡需然書墨迹一匣

上黨佛祠何可觀開元瑞物圖高閣又有長廊古壁上復
是名輩題丹牖當時泥用絲作筋意欲千載無剝落書奇
畫妙了不識訛傳墨土能治平瘡寺僧不惜人指取筆畫

遂缺如鳥啄後來好事恐磨滅寶刀裁刻泥如剝取之龜
置綠板匣便寶箱楮同美璞拂拭還看體勢生盤屈蒼虬
舞鸞鶯在昔不畏屋壁壞今也常恐兒童撲夫君知我心
所重南歸贈以致誠懇此時雖喜落吾手老大腕硬無由
學但當拜貺不敢忘莫爲報言曾未數

寄永興招討夏太尉

代人

寶元元年西夏叛天子命將臨戎行二年孟春果來寇高
奴城下皆氏羗五原偏師急赴敵晝夜不息趨戰場馬煩
人怠當勁■雖持利器安得強二師覆敗乃自取豈是廊
廟謀不臧朝廷又選益經略三幟賢俊務所長或取李愬
備邊策或欲五道出朔方仲夏科民挾弓矢季冬括驢賫
道糧官軍未進復犯塞塞旗殺將何倡狂遂令士卒愈沮
氣欲使乘障膽不張我願助畫跡且遠側身西望空淒涼
庶幾一言可裨益臨風欲寄鳥翼翔所宜畜銳保城壁轉
饋先在通行商守而勿追彼自困境上未免小斂攘譬如
蚊虻嗜膚體實於肌血無大傷此言雖小可喻遠幸公采
用不我忘誠知公慮若裴度聖上聽用同憲皇當時豈不
歷歲月猶且衆鎮未陸梁况今鷹犬乏雄勇便擬馳騁徒
蒼惶且緩須時勵犀卒終期拉朽功莫當

桓妬妻

昔聞桓司馬娶妾貌甚都其妻南郡主悍妬誰與俱持刀
擁羣婢逕往將必屠妾時在窗前解鬟臨鏡梳鬢髮雲垂
地瑩姿水照壺妾初見主來縮髻下庭隅斂手語出處國
破家已殂無心來至此豈願奉君娛今日苟見殺雖死生

不殊主乃擲刃前抱持一長吁曰我見猶憐何況是老奴
盛怒反爲喜哀矜非始圖嫉忌尚服美傷哉今亦無

舟次朱家曲寄許下故人

藹藹桑柘岸喧喧鷄犬村晚雲連雨黑秋水帶沙渾稍聽
鄰船語初分異土言雖嗟遠朋友日喜近田園

醉中留別永叔子履

新霜未落汴水淺輕舸唯恐東下遲遠城假得老病馬一
步一跛令人疲到君官舍欲取別君惜我去頻增喜便步
髯奴呼子履又令開席羅酒卮逡巡陳子果亦至共坐小
室聊伸眉烹鷄庖兔下筯美盤實飢餒粟與梨蕭蕭細雨
作寒色耿耿盡醉安可辭門前有客莫許報我方劇飲冠
憤歎文章或論到淵奧輕重曾不遺毫釐間以辨詐每絕

倒豈顧明日無晨炊六街禁夜猶未去童僕竊訝吾儕
談兵究弊又何益萬口不謂儒者知酒酣耳熱試發泄二
子尚乃驚我爲露才揚已古來惡卷舌噤口南方馳江湖
秋老鱖鱸熟歸奉甘旨誠其宜但願音塵寄鳥翼慎勿却
効兒女悲

赴雪任君有詩相送仍懷舊賞因次其韻

湖山饒遠處曾省牧之遊鴈落葑田濶船過菱渚秋野煙
昏古寺波影動危樓到日尋題墨猶應舊壁留

歲日旅泊家人相與爲壽

舟中逢獻歲風雨送餘寒推年增漸老永懷殊鮮歡江邊
無車馬鑑裏對衣冠孺人相慶拜共坐列盃盤盤中多橘
柚未咀齒已酸飲酒復先醉頗覺量不寬岸梅欲破萼野

水微生瀾來者卽爲新過者故爲殘
年觀時節未變易人世良可歎

昨日趣乃作去

依韻和胡武平懷京下游好

南國易悲愁西風起高樹枯荷復送雨度鴈寧知數欲問
北來音繫書復若故冥飛杳無跡弋者徒有慕况在白蘋
洲而懷石渠署石渠多故人鷓鴣方騫翥鳴尚可希絳
翼何由附主人賴知己未變疇昔顧乘桴豈仲尼好勇非
季路幸依南郡帳不學邯鄲步自守終日愚都志向時慮
睽戀此江湖親年當喜懼旣獲庭闈近又多山水趣邈來
對明月千里猶會晤長橋人絕聲舉酒逢秋露迥聞孤舟
笛煙水在何處俯檻意無涯跳波魚夜乳頗得真隱情奚
須慕巢許思寄梅枝香遠隔蘭溪渡緘之付好風精爽亦

隨去

送劉成伯著作赴弋陽宰

我昨之官來值君爲郡掾當年已知名是日纔識而未久
嗟還都始應羣公薦遂除芸省郎出治江上縣縣劇素所
聞其俗到可見水精製盤盃冰瑩產郊甸鳴箏斲桐梓雕
飾雜寶絢有藥化銅鈇方士多伏鍊君今齒尚壯好學常
不倦二者定非惑吾言亦狂狷絃歌將有餘幸可窮經傳
歸來期著書篋楮盈百卷莫學此疎慵無能守貧賤明朝
君當行勉勉自出餞豈無一壺酒豈無一鼎饌

冬雷

上帝設號令隱其南山下震發固有時曷常事憑怒春以
動含生夏以奮風雨冬其息不用藏在黃厚土我今來江

南歲曆惟建午如何小雪前向曉疑鳴釜蛟虵龜蟲厄鱗
裂口塊吐蝦蟇不食月溪窟僵兩股天公豈物欺若此泪
時序或言非天公實乃陰怪主嘗觀古祠畫牛首椎連鼓
黑雲雜狂飈相與爲肺腑是不由昊穹安能順寒暑吾因
考厥事復以驗莽鹵市井欺量衡定知不活汝元惡逆大
倫弗加霹靂斧此豈曰無私故予未所取必恐竊天威似
將文法侮焉顧五行錯詎畏萬物覩欲扣九門陳恨身無
鳥羽

冬日陪胡武平游西余精舍

侵晨霜氣嚴溪口水已合鳥榜將進遲寒篙旋摧拉遙看
松竹淡雪屋藏山衲登臨興都蓋薄暮沿清溪

送崔主簿赴睦州清溪

舟輕不畏險逆上子陵灘七里峽天翠千重雲木寒古祠
鳴野鳥亂石激春湍正與高懷愜寧歌行路難

送潘供奉承勛

與君迹熟情已親欲將行邁聊感人舉酒不能効時俗半
辭苦語資立身長大實好帶刀劔曷不往助清邊塵門戟
雖高豈自有當思乃祖爲功臣所宜勇躍發奇策嘉名定
體庶得真儻以斯言作狂說乘肥食脆任青春

寄題徐都官新居假山

太湖萬穴古山骨共結峰嵐勢不孤苔徑三層平木末河
流一道接墻隅已知谷口多花藥祇欠林間落狎麕誰侍
巾構此遊樂里中遺老官相呼

依韻和武平別後見寄

溪遠橋危一望遙此焉悽絕府中僚已同鴈鷺依清淺其
看鸞皇上沈寥別岸無端縈細柳迴舟不忍過新橋醉來
事事能生感誰道愁腸酒易銷

過華亭

晴雲噪鶴幾千隻隔水野梅三四株欲問陸機當日宅而
今何處不荒蕪

迴自青龍呈謝師直

共君相別三四年巖巖瘦骨還依然唯髭比舊多且黑學
術久已不可肩嗟余老大無所用白髮冉冉將侵顛文章
自是與時背妻餓兒啼無一錢幸得詩書銷白日豈顧富
貴摩青天而今飲酒亦復少未及再酌腸如煎前夕與君
歡且飲飲纔數盞我已眠鷄鳴犬吠似聒耳舉頭屋室皆
左旋起來整巾不稱意掛帆直走滄海邊便欲騎鯨去萬
里列缺不借霹靂鞭氣沮心衰計欲睡夢想先到蘋渚前
與君無復更留醉醉死誰能如謫仙

青龍海上觀潮

百川倒蹙水欲立不久却迴如鼻吸老魚無守隨上下閣
向滄洲空怨泣推鱗伐肉走千艘骨節專車無大及幾年
養此膏血軀一旦翻爲漁者給無情之水誰可憑將作毒
常自輕入何時更看弄潮兒頭戴火盆來就濕

社前

欲社先知雨將歸未見花那能長作客夜夜夢還家

牡丹

洛陽牡丹名品多自謂天下無能過及來江南花亦好尋

紫淺紅如舞娥竹陰水照增顏色春服貼妥裁輕羅時結
游朋去尋玩香吹酒面生紅波粉英不忿付狂蝶白髮強
插成悲歌明年更開余已去風雨摧殘可奈何

觀居寧畫草蟲

古人畫虎鵠尚類狗與鶩今看畫羽蟲形意兩俱足行者
勢若去飛者翻若逐拒者如舉臂鳴者如動腹躍者趨其
股顧者注其目乃知造物靈未抵毫端速毗陵多畫工圖
寫空盈幅寧公實神授坐使羣輩伏草根有織意醉墨得
已熟權豪不可致節行今仍獨

悼亡三首

結髮爲夫婦于今十七年相看猶不足何況是長捐我鬢
已多白此身寧久全終當與同穴未成淚漣漣

每出身如夢逢人強意多歸來仍寂寞欲語向誰何窻冷
孤螢入宵長一鴈過世間無最苦精爽此銷磨
從來有脩短豈敢問蒼天見盡人間婦無如美且賢譬今
愚者壽何不假其年忍此連城寶沉埋向九泉

書哀

天旣喪我妻又復喪我子兩眼雖未枯片心將欲死雨落
入地中珠沉入海底赴海可見珠掘地可見水唯人歸泉
下萬古知已矣拊膺當問誰憔悴鑑中鬼

偶書寄蘇子美

君詩壯且奇君筆工復妙二者世共寶一得亦難料我今
或盈軸體逸思益峭有如秋空鷹氣壓城雀鷄又如飲巨
鍾一舉不能醕旣醕心已醉顛倒視兩曜吾交有永叔勁

正語多要嘗評吾二人放檢不同調其於文字間苦硬與
惡少雖然趣尚殊握手幸相笑

送李殿丞通判處州

拜官將近親不畏千里險沂流上贛水石亂波驚颭舟人
素已諳曲折就迴閃豈虞失便利倚慣憂亦掩昔余從平
流悸夢尚成魘今逢子方去青絳絲新染沙頭有堠吏惴
立板方斂鴻鴈正來翔競看朱服儼

蔡仲謀遺鯽魚十六尾余憶在襄城時獲此魚留以

遲歐陽永叔

昔嘗得圓鯽留待故人食今君遠贈之故人大河北欲膾
無庖人欲寄無鳥翼放之已不活烹煮費薪棘

送蘇子美

勇爲江海行風波曾不懼但欲尋名山扁舟無定處南有
鵬若鴟臉有石若鋸毒草見人搖短狐逢影怒不遐尚苦
乖更遠饒瘴霧東土乃濱海蜃鼉仍可怖殼物怪瑣屑羸
蜺固無數鹹腥損齒牙日月復易飮二方旣若此往矣無
久駐竟當西北來醉耐炙肥豈夏不厭漿酪冬不厭雉兔
勿言專口腹口腹人所務天台信奇偉石橋非坦步廬岳
趣最幽饑腸看瀑布此致雖爲高實亦難久慕君行聽我
言不聽到應悟

寄洪州致仕李國博

湖上悠然度幾春勇拋榮祿遂天真青蒲翠竹圍華屋白
酒黃雞命里人果下有時乘小駟兒曹方見擁朱輪田園
歲入千鍾美官似疎家苦畏貧

永叔贈酒

天門多奇醞一斗市錢千貧食尚不足欲飲將何緣豈能以口腹屈節事豪權閉戶飽於藿作詩湧如泉一日復一夕醒日常不眠窮臘忽可怪雙壺故人傳呼兒欲自酌瓦盞無完全其能饗甘脆而况侑天妍却令情懷惡分與富貴偏收拾不復嘗排置屋角邊儻嘉客至傾倒相與顛何暇問濃薄但覺窻扉旋誰識我爲我賓主各頽然始得語且橫旣醉論益堅曾不究世務閑氣爭古先畢竟兩未決辨吻空流涎嗟我儒者飲聒耳無管絃雖云暫歡適終久還愁煎自甘不偶死寧募金印懸願頻致此物勿恤瘡檐肩

辛著作知西京永寧

躍馬西畿令家瑩在洛陽衣霜寒食雨花發故宮墻冷淡鷓鴣屋寬閑水滸塘送君悲漸老空憶釣伊魴

正月十五夜出廻

不出只愁感出遊將自寬貴賤依儔匹心復殊不歡漸老情易厭欲之意先闕却還見兒女不語鼻辛酸去年與母出學母施朱丹今母歸下泉垢面衣少完念爾各尚幼藏淚不忍看推燈向壁卧肺腑百憂攢

戲寄師厚生女

生男衆所喜生女衆所醜生男走四鄰生女各張口男大守詩書女大逐鷄狗何時某氏郎堂上拜媪叟

冬夕會飲聯句

與君數夜飲唯恐酒盞空今我苦欲淺堯臣語志難比同

陳編侑歡適

謝景初

問誰何魁雄婢子寒且倦

堯臣

主人

哦不窮燈青屢結花

景初

煎響時鳴蟲穴鼠暗出沒

堯臣

風鴈高雍容冰霜覆瓦屋

景初

貂狐輸貴翁孤床乏暖質

堯臣

苦語有淡工咀嚼患傷小

景初

煨炮驚殼紅落蟾斜

入窾

堯臣

遠漏微遞風醉心欺睡魄

景初

細書刺昏瞳吽

呀聞爭犬哮吼厭啼躑撥火亂頰豆附炙雙彎弓乾果硬

迸齒

堯臣

寒齏酸滿胸枯蛤孽無肉淡脯燒可饗語必造

聖賢樂已過鼓鐘紙窗幸未曙

景初

絮被令旋縫凍痺兩

股鐵跑抓雙鬢鬚尿既懶溺視虱唯欲烘噐皿足缺齧

捧執無妖穠兒女寒不寢

堯臣

僮僕困欲背豈無富貴徒

笑此飢寒蹤丈夫固有負道義久已充墨子不黔突齒輩

且得封勉哉梅夫子塞者終自通

景初

郡閣閱書投壺和呈相國晏公

較量人世無窮樂羅列平生未見書聊奉投壺祭征

言擊劔馬相如畫樓晚去聞寒角縹帙看來落蠹魚日獲

誨言皆舊學不慙貧賤帶經鋤

和欲雪

雪欲漫天落雲初著地垂臂鷹過野健走馬上冰遲公子

多論酒騷人自詠詩都無少年意只卧竹窗宜

四月二十七日與王正仲飲

我來自楚君自吳相遇泚波銜舳艫時時舉酒共笑樂莫

問罌盎有與無醉憶曩同吾永叔倒冠落佩來西都是時

豪快不顧俗留守贈榼少尹俱高吟持去擁鼻學雅閑付

唱纖腰姝山東腐儒漫側目洛下才子爭歸趨自茲離散

二十載不復更有一日娛如今舊友已無幾歲晚得子欣
爲徒

月下懷裴如晦宋中道

九陌無人行寒月淨如水洗然天宇空玉井東南起我馬
卧我庭帖帖垂頸耳霜花滿黑鬣安欲致千里我僕寢我
廐相背肖兩已夜深忽驚魘呼若中流矢是時與我懷顧
影行月底唯影與月光舉止無猜毀吾交有裴宋心意月
影比尋常同語默官問世俗子

同蔡君謨江鄰幾觀宋中道書畫

君謨善書能別書宜獻家藏天下無宣獻既沒二子立漆
匣甲乙收盈厨鍾王真蹟尚可觀歐褚遺墨非因模開元
大曆名流夥一一手澤存有餘行草楷正大小異點畫勁
宛精神殊坐中鄰幾素近視最辨纖悉時驚吁逡巡蔡侯
得所得索研鋪紙纔須臾一掃一幅太快健檀溪躍過瘦
的盧觀書已畢復觀畫數軸江吳種稻圖稻苗秧秧水拍
拍羣鷺矯翼人荷鋤陂塍高下石籠密竹樹叅倚荆籬疎
大車立輪轉流急小犢欺顧稚子驅令人頻有故鄉念春
事况及蠶桑初虎頭將軍畫列女二十餘子拖裙裾許穆
夫人尤窈窕因誦載馳誠起余余無書性無田區美人雖
見身老癯舉頭事事不稱意不如倒盡君酒壺

東城送運判馬察院

春風騁巧如剪刀先裁楊柳後杏桃園尖作瓣得疎密顏
色又染燕脂牢黃鸝未鳴鳩欲雨深園靜墅聲嗷嗷役徒
開汴前日放亦將決水歸河槽都人傾望若隻渴寒食已

近溝已淘何當黃流與雨至雨深一尺水一篙都水御史
亦卽喜日夜順疾回輕舫頻年吳楚水苦旱一稔未足生
脂膏吾願取之勿求羨窮鳥困獸易遯逃我今出城勤送
子沽酒不惜典弊袍數途必向睢陽去太傅太尹皆英豪
試乞二公評我說萬分豈不益一毛國給民蘇自有暇東
園乃可資遊遨

送知和州杜駕部

桐花欲開時羣囀爭哺兒但求黃口飮焉問丹穴飢常山
有四鳥將飛昔已悲中間勿殞逝豈得安其枝一飲必屢
顧每啄必遲遲今朝竟矯翼去向江之湄銜芹不自食欲
遺孤與雌此義實已重莫爲梟所嗤世俗多嫌忌我胡爲
此詩此詩美孝悌持贈杜挺之

觀何君寶畫

燕馬易畫吳牛難圖馬骨應細牛骨竈馬毛要密牛毛疎
竈疎必辨別細密多模胡乃知戴嵩筆能出韓幹徒幹馬
精神在韁勒嵩牛怒鬪無牽拘昨日何家觀小軸綃雖破
爛色不渝二頭相觸角競倚前脚如跪後脚舒尾株榻直
脊脊感筋力寫盡蹄腕殊一勝一敗又苦似勝者狠逐敗
者趨卷窮赤印置小字置字乃是陶尚書尚書國初人愛
畫收幾厨買時不惜金與帛帛載羊車錢載驢後世兒孫
不能保賣入窮市無須與凡目矜新不重故千錢酬直皆
笑愚四牛遂爲何氏有裝背入眼天下無坐中吾儕趣已
異又喜玄女傳兵符此本實稱閻令畫下筆簡細容顏姝
三人鬼狀一牛首八女二十美丈夫黃帝中間蔭葩蓋霞

扇錯玳旌擁朱冠服難知歲月遠但見儀衛森清都復觀
鹿臺獨夫受姐已不笑何由娛酒池肉林騎行劒剖心斷
脛堪悲吁數幅吳王宴西子綵舟張樂當姑蘇宮娥數百
簇高下鬢髻一一紅芙蓉危峰細浪得平遠前對洞庭傷
大湖商紂夫差可垂誠歷世傳玩參盤孟雕鷹草木不足
記特詠此事心何如

送少卿張學士知洪州

朱旗畫舸一百尺五月長江水拍天穩去先應望廬岳暫
來誰復見龍泉閣經吏部重爲記山識吳王舊鑄錢往迹
可尋軍士少瞻書遺逸附青編

觀楊之美畫

天官乘車建朱旗赤旛前亞風卷披二龍緩駕蒼髯

箱傍挈文籍隨雙驂推輓如良遲行從冠服多威儀水官
自有真龍騎兩佐並跨鯨尾螭步趨羣吏怪眼眉雲生海
面無端涯雷部處上相與期人身獸爪負鼓馳後有同類
挾且搥次執電鏡風囊吹青虵有角魚足鬢上下引導神
所施地官旣失不可知此畫傳是閻令爲設色鮮潤筆法
奇綃理膩滑雞子皮吳生龍王多裂隳八軸展玩忘晨炊
李成山水曉景移黃荃花竹雀擁枝韓幹馬本摸搭時神
駿都失存毫釐日高腹枵眼眈眈迨獲見何言疲厚謝
主翁意不衰他日飽目看無遺

李審言遺酒

大梁美酒斗千錢欲飲常被饑窘煎經時一滴不入口漱
齒費盡華池泉昨日靈昌兵吏至跪壺曾不候報笈赤泥

坼封傾瓦盜母妻共嘗婢流涎鄰家葡萄未結子引蔓垂
過高墻巔當街賣杏已黃熟獨堆百顆充盤筵老年牙疎
不喜肉况乃下筯無腥膻空腸易醉忽酩酊倒頭夢到上
帝前賜臣蒼龍跨入月不意正值姮娥眠無人來顧傷玉
兔便取作腊下九天拔毛爲筆筆如椽狂吟一掃一百篇
其間長句寄東郡東郡太守終始賢切莫汲竭滑公井留
釀此醕時我傳

送邵郎中知潭州

張鏡疊吹洞庭外綠虎帶刀蠻帥迎且諭漢家綏撫厚莫
言湘守事權輕木奴洲近霜包熟班竹林昏野鳥鳴賈誼
宅邊寒井在暫留千騎漱餘清

和江鄰幾景德寺避暑

蛭蟻不應雨鳴鶯不生風鬱氣若甑炊初陽如火紅輟膚
汗交流脂體膏將鎔龍頭費挹酌犢鼻強遮蒙常畏俗物
來去避青蓮宮廣堂鋪琉璃高簷蔭梧桐廊壁畫地獄獄
具鑊鋸舂鐵城何焔焔鐵牀亦彤彤誰知炮烙死活間傳
自西域黃面翁正類人世苦此熱聲利役使亡西東京師
貴貨幾椽舍窮煎相似聒欲聾屋頭朝爨作飲食枕底夕
艾驅蚊蟲宜爾近巷江夫子賦詩特壓塵土中

送趙簡議知徐州

鹿車幾兩馬幾匹軫建朱幡騎殼弓雨過短亭雲斷續鶯
啼高柳路西東呂梁水注千尋險大澤龍歸萬古空莫問
前朝張僕射毬場細草綠蒙蒙

晨起裴吳二直講過門云鳳閣韓舍人物故作詩哭

之

平生交友淚又哭寢門前魯叟不言命楚人空問天月沉
滄海底星墮太微邊莫恨終埋沒文章自可傳

送王察推鎮之鄧州

昔向南陽憶洛陽秋橙初熟半林黃車過白水沙痕潤鴈
落鉗盧稻穗長廢壘漢碑金刻字古原秦冢石爲羊太平
羽檄何曾有賓主相歡菊薦觴

送李中舍襲之宰南鄭

莫問襄中道路難襄陽直上幾重灘蒼煙古柏漢高廟落
日荒茅韓信壇出水槎頭一絲挂穿虹雨脚兩橋殘土風
大抵如南國期會先時俗自安

送石昌言學士

混混拍堤瓜蔓水軒軒銜尾挂橋船使君東下只朝夕父
老走迎無後先古堞秋耕拾銅鏃長淮瀑雨入壕蓮鳴猿
舞鶴仍持去不憶承明夜直眠

書南事

大梁國南門駟騎方騰趨波波一何急蠻寇圍番禺番禺
本無備前賴魏大夫大夫築子城今得守以須兵雖不滿
萬閉壁堪指呼老幼轉木石壯健操矛弧廩庫得以完日
月不易圖城中舊無井魏鑿安轆轤魏由飛語去不使立
外郭古稱時有待淺薄皆謂紆曲突與爛額看取報功殊
七月十六日赴庾直有懷

白日落我前明月隨我後流光如有情徘徊上高柳高柳
對寢亭風影亂疎牖我馬卧其傍我僕倦屈肘寂寂重門

局獨念家中婦乳下兩小兒夜夜啼向母問爺若箇邊天
性已見厚不嗟羈枕孤不愧棲禽偶內有子相憶外有月
相守何似長征人沙塵聽刁斗

飲劉原甫家原甫懷二古錢勸酒其一齊之大刀長
五寸半其一王莽時金錯刀長二寸半

主人勸客飲勸客無天妍欲出古時物先請射以年我料
孔子履久化武庫煙固知陶氏梭飛朱風雨天世無軒轅
鏡百怪爭後先復聞豐城劍已入平津淵聊儻二百載儻
有書畫傳嗚呼纔十一便可傾觥船探懷發二寶太公新
室錢獨行齊大刀鎌形末環連文存半辨齊皆有模法圓
次觀金錯刀一刀平五千其文如此精銅不蠹蝕肉好鉤婉全
爲君舉酒盡跨馬月娟娟

蔡君謨示古大弩牙

黃銅弩牙金錯花銀闌線齒如排沙上立準度可省括箭
溝三道前直窠其度四寸寸五刻鏤光歷歷無纖差蔡侯
出此問誰得往年客遺來瑯琊瑯琊築城穿厚壤旣獲磨
洗爭傳誇莫知歲月孰製作精妙近世應難加發機高下
在分刻今人妄射功仍賒願侯擬之起新法勿使邊兵死
似麻

寄題周敦美琨瑤洞

仙人采玉驅雄龍列山剖璞青腔空因邃爲堂曲爲室石
乳溜壁光玲瓏仙歸龍去草樹長蔽翳不復人蹤通指壇
買墅下峰下洗斲務欲險怪窮地鱗鹿跡尚莫到安問樵
老諸牛童古人未得今已得萬景付與由天公何當歸來

斂頭角任從寶我生白虹陰溪淺水菖蒲綠下有蝦蟇雙
眼紅及時佐酒斫兩股勿使更入明月中

許生南歸

大盤小盤堆明珠海估眩目迷精斲斗量入貢由掇拾未
必一一疵類無不貢亦自有光價此等固知魚目殊許生
懷文頗所似暫抑安用頻增吁倚門老母應日望霜前稻
熟春紅稔歸來爛炊多釀酒洗蕩幽憤傾盆益九卿有命
不愁晚朱邑當年是嗇夫

送臨江軍監酒李太博

三江卑濕地北客宦遊稀霧氣多成雨雲蒸易損衣白醪
燒甕美黃雀下田肥未辨殊方語山歌半是非

送晉原喬主簿

太守登車時我病不能出遙期玩海棠度險馬屢叱唯畏
行邁遲惡欲及春日何爲愛此花曾非桃杏匹生紅濃復
淺瘦蒂脩且密湖傍幾十樹雕盤擁新漆酒傾琉璃盆月
上歡未畢縣官同遠宦簿領無督詰刻意詠芳菲追補李
杜失

送樂職方知泗州

長堤凍柳不堪折窮臘使君單騎行蘇合輕裘霜莫犯銅
牙大弩吏先迎山旁楚賈連檣泊水上禹書寒磬清試向
郡樓東北望煙波千里月臨城

和劉原甫十二月十日試墨

海神不朝雪不作大梁塵土蔽天高道傷牛喘復誰問佛
寺吹螺空唱喙相公跪香恬且伏陛下減膳心焦勞因君

試墨偶有激勇辭壯筆揮長刀予無奈何亦思飲飲竭甕
甕從舖糟

十九日出曹門見水牛拽車

只見吳牛事水田只見黃犂負車輓今牽大車同一羣又
與騾驢走長陌叩頭濶步塵蒙蒙不似緩耕泥汨汨一一
夜眠頭向南越鳥心腸誰辨白

除夜雪

擊鼓人驅鬼漫天雪送寒臘從今日盡花作舊年看著樹
多還墮隨風積更乾明朝預王會長濕兩梁冠

送宣州簽判馬屯田兼寄知州邵司勳

寒溪翠拖碧玉帶蒼山晴卧蛻骨龍水邊苦竹抽肥筍石
上老蕨拳紫茸泊船繫纜宿明鏡昭亭廟古攢瘦松陰風
雨電潭心起雲遮北嶺如墨濃田秧浸綠白鷺立內史出
喜嘉賓從昔時謝公來賽神蘭有作椒金作鍾聯詩姓何
名已失板蠹粉落蟲鳥蹤我鄉復傳召南化磨鏤黑石君
亦逢

觀拽龍舟懷裴宋韓李

截春流築沙坻拽龍舟過天池尾矯矯角岐岐千夫推萬
鱗隨驚鴻鵠沉魚龜春三月輕服時薄水殿習水嬉馬特
特來者誰魏公子人不窺車轡鱗集其涯邯鄲倡士交馳
銀餅索酒傾玻璃用錢如水贈舞兒却入上苑看鬪雞擊
毬彈金無不爲適聞天子降玉輦當門虎脚看大旗春風
吹花入行輶紅錦百尺爭蛟螭雲蓋廻絲纜維明年結客
觀未遲

答劉原甫

生早多交友常恨會遇稀每念相笑語昨是今或非重惜
向時游出處苦乖違從今儻有酒莫問梨栗微前夕呼我
飲遣奴來扣扉暗犯風雪往醉脫冠服歸夜來新霽月清
吐萬里輝劉郎戴幅巾江叟披褐衣相過無百步誰虞竊
訶譏三家若循環但知具甘肥

十一日丞拱殿起居聞南捷

二月雪飛雞狗狂錦衣走馬回大梁入奏邕州破蠻賊絳
袍玉座開明堂腰佩金魚服金帶榻前拜跪稱聖皇一朝
嚴氣變和氣初令漏泄飛四方將軍曰青才且武先斬逗
撓兵後強從來儒帥空賣舌未到已愁茆葉黃徘徊嶺下
自稱疾詔書切責仍勉當因人成功喜受賞親戚便擬封
侯王昔日苦病今不病銅鼓弄擲無鏢鎗

十五日雪三首

寒令奪春令六花侵百花塘水膠鸞背野水澀芹牙擁柱
輕於絮吹墀淨若沙乳禽饑啄木誰悞撥琵琶
新雷奮虵甲密雪鬪鵝毛正欲裁輕縠重令著弊袍沙泉
流復凍煙萼坼還韜只待鄰醅熟微聲聽酒槽
春風九日一半已銷磨準擬看花少依稀詠雪多官車
猶載炭菹鵲不離窠向此興都盡戴家誰復過

淘渠

開春溝畎春泥五步掘一壟當塗如壞堤車無行轍馬無
蹊遮截門戶雞犬迷屈曲指足高復低芒鞋苔滑雨淒淒
老翁夜行無子攜眼昏失脚非有擠明日尋者爾瘦妻手

提幼女哭嘶嘶金吾司街務欲齊不管人死獸顛啼

京師逢賣梅花五首

北土只知看杏藥大梁亦復賣梅花此心還似庾開府不
惜金錢買翠誇

驛使前時走馬迴北人初識越人梅清香莫把茶蘼比只
欠溪頭月下杯

憶在鄱君舊國傍馬穿脩竹忽聞香偶將眼趁蝴蝶去隔
水深深幾樹芳

曾見竹籬和樹夾高枝斜引過柴扉對門獨木危橋上少
婦髻鬟猶戴歸

此去吾鄉二千里不看素萼兩二年移根種子誰辛苦上
苑偷來值幾錢

送胥平叔寺丞赴洛

單車細馬出虎牢春雲黓黓百舌喙穀雨已近花欲盡秉
燭夜飲朝坐曹因君重思昔日歡醉筆狂掃嵩丘高于今
零落二十載縱在各各歎二毛試採上陽何首烏刮切仍
致苦竹刀俗情相望亦異此競欲折筍籠含桃

送胡公疎之金陵

綠蒲作帆一百尺波浪疾飛輕鳥翮瓜步山傍夜泊入石
頭城邊舊遊客月如水輪出海來江波千里無物隔自古
有恨洗不盡于今萬事何由白依稀可記鮑家詩寂寞休
尋江令宅楊花正飛鮭魚多食膾舉酒謝河伯但令甘肥
日飽腹誰用麒麟刻青石去舸已快風亦便寧同步兵哭
車輓

送汝陰宰孫寺丞

編郎唱擗鷺尾下頴水落日蛇鱗生綠蒲被岸漁網舉黃
鳥啄甚綠車鳴吏無話租官正來不借魴鱖與吏烹饋吏
人情見里黨官非喜慢知官清

吳冲卿出古飲鼎

精銅作鼎土不蝕地下千年蘚花冪腹空鳳卵留藻文足
立三刀刃微直左耳可執口可斟其上兩柱何對植從誰
發掘歸吳侯來助雅飲歡莫極又荷君家主母賢翠羽胡
琴令奏側絲聲不斷玉箏繁繞樹黃鸝鳴不得我雖衰來
爲之醉玩古樂今人未識

二十四日江鄰幾邀觀三館書畫錄其所見

五月秘府始暴書一日江君來約予世間難有古畫筆可
往共觀臨石渠我時跨馬冒熱去開厨發匣鳴鑰魚義獻
墨迹十一卷水玉作軸光疏疏最奇小楷樂毅論永和題
尾付官奴又看四本絕品畫戴嵩吳牛望青蕪李成寒林
樹半枯黃荃工妙白兔圖不知名姓貌人物二公對奕旁
觀俱黃金錯鏤爲投壺粉障復畫一病夫後有女子執巾
裙牀前紅氍毹平圍爐牀上二妹展氍毹繞牀屏風山有無
畫中見畫三重鋪此幅巧甚意思殊孰真孰假丹青模世
事若此還可吁

依韻和原甫月夜獨酌

月下馬蹄休擾擾夜涼蟲響競囂囂一杯獨飲愁何有孤
榻無人膝自搖北斗柄高天漸轉小冠簪冷髮微凋誰知
靜對頽然影竟夕幽懷豈易聊

與蔣祕別二十六年田棊二十年羅拯十年始見之
我今五十二嘗苦離別煎屈指數離別正去一半年三君
異出處相見有後先蔣最會遇早羅倍晚於田仕宦比我
遲官資居我前此亦漫輕量無限歸荒埏所喜笑語同各
驚顏貌遷髮有霜華侵目有蜘蛛懸有酒易以醉有奚徒
用妍醒來念功名病蠲希蜿蜒安得有園廬寬閑近林泉
養魚數千頭種薤三四屢餘蔬皆稱此嘉果值亦然既無
俗造請窮冬事高眠困貯白粳稻酒沾青銅錢飯過引數
杯令兒誦嘉篇仰首看赤日區區隨天旋朝見出滄海暮
見入虞淵畢竟將何窮磨滅愚與賢億億萬萬載筋骨非
玉堅桐棺三寸厚在昔誰免焉去去欲及時嗟嗟無由緣
飲劉原甫舍人家同江鄰幾陳和叔學士觀白鵬孔

雀鳧鼎周亞夫印鈿玉寶赫連勃勃龍雀刀

主人鳳皇池二客天祿閣共來東軒飲高論雜談謔南籠
養白鵬北籠養孔雀素質水紋織翠毛金縷薄大誇鳧柄
鼎不比龍頭杓玉印傳條侯字辨亞與惡鈿劔刻辟邪符
寶殊制作未觀赫連刀龍雀鑄鑿鏐每出一物玩必勸衆
賓酌又令三雲髻行酒何婢約固非世俗躡自得閱古樂
聖賢泯泯去安有不死藥竟知不免此烏用強檢縛開目
卽是今轉目已成昨歸時見月上酒醒見月落恍然如夢
寐前語誠不錯

劉涇州以所得李士衡觀察家號蟾蜍硯其下刻云

天寶八年冬端州刺史李元德靈卵石造示劉原
甫原甫方與予飲辨云天寶稱載此稱年僞也遂

作詩予與江鄰幾諸君和之

硯如剗摹腹如月又若剗瓢萌強發鐫題天寶年造之刺
史李元傳自越剗摹剗瓢我莫分稱載作年初辯君君雖
能辯猶曰寶原甫詩云李侯寶硯劉侯得寶茲偽物吾何云仰天大笑
飲君酒硯真硯偽休開口願封漆匣還與侯請共江翁獨
持守江詩云劉侯寶此物志慎勿將心逐名轉

次韻和景彞閏臘二十五日省宿

君嘗納史似吳兢又直甘泉馬踏水重臘雪花方漫漫宿
廳書架自層層案頭美酒初溫火簾底微風欲動燈永夜
未眠鐘已發此心閑寂是高僧

次韻和永叔新歲書事見寄

尖風細細欲穿簾殘雪微銷凍結簷盞裏醇醪無限滿鏡
中白髮不知添妍童喜舞開羅幕小吏愁嘶入硯蟾幸得
從公持直筆定應無復歎齏鹽

李廷老祠部寄柑子

踏雪衝風馳小吏帶霜連葉寄黃柑癖包欲咀牙全動舉
盞逢衰酒易酣書尾自題知遠意筆頭親答厭多談故人
莫覓新詩卷都似嵇康七不堪

韻語答永叔內翰

世人作肥字正如論饅頭厚皮雖然佳俗物已可羞字法
歎中絕今將五十秋近日稍稍貴追蹤慕前流曾未三數
人得與古昔儔古人皆能書獨其賢者留後世不推此但
務於書求不知前日工隨紙泯已休顏書苟不佳世豈不
寶收設如楊凝式言且直節脩又苦李廷中清慎實罕侔

乃知愛其書兼取爲人優豈書能存久賢哲人焉廋非賢
必能此惟賢乃爲尤其餘皆泯泯死去同馬牛太尹歐陽
公昨日喜疾瘳信筆寫此語謂可忘病憂黃昏走小校寄
我東郭陬綴之輒成篇聊以助吟謳

次韻和長文社日禳祀出城

曉出春風已罷條應逢社伯馬蹄驕壇邊宿雨微霑麥水
上殘冰壅過橋鷺子飛來依約近鴈行歸去試教調北扉
西掖多才思相與飄飄在沈寥

次韻和長文禳祀郊外見寄并呈韓子華

鶉鴝知雨在桑中雄逐雌飛自不同胡粉未生輕蝶白燕
脂先綻野櫻紅高高樹裏鞦韆月獵獵墻頭倍蕾風曉下
祠壇多寄咏衣冠方侍大明宮

送馬行之都官

昭亭山下送君時不畏西行劔棧危竿馬跨來身更健吳
船乘去計非遲錢塘湖上尋雲屋巾子峰前種槿籬此趣
已高天下士不須功業似鷗夷

次韻和永叔石枕與笛竹簟

溪上枕剖龍卵石斲匠葦製蛇皮紋客從東方一持贈竹
色蒸青石抱雲磨沙斲骨自含潤飽霜弔節無留塵京師
貴豪空有力六月耐此炎蒸劇旱風赤日吹熱來大厦高
簷任雕飾頭臚汗匝無富貧雖有頰冰論官職官高職重
冰則多日永冰消難更得唯公掃室施枕簟迎涼自感東
方客東方客應非俗昏能使賢人心體適賢人何以偏伏
人天下才名方赫赫我吟困窮不可聽晝夜蚊蚋蒼蠅聲

蠅如遠鷄耳初感蚊若隱雷空際鳴葛厨頂綻屋蝸墮管
席中裂麻經橫平生賦分只煎炒安有綠玉琉璃清猶勝
昔年杜子美老走耒陽牛芻死因思楊惲廢時言但願人
生行樂爾公今事業在朝廷去就尤當慎終始待公睡足
秋風來去奉高談揮塵尾

次韻和景彞省闈宿齋

晝日南宮雨後涼齋嚴官重靜於常庭前鬪雀墮還起欄
下秋花落自香看盡雲容天漏碧讀殘書帙卷披黃九衢
塵土莫能到蕭瑟微風葉響廊

次韻和景彞對月

蕭蕭風雨變涼意索索晚雲開斗晴已洗浮埃天外靜忽
生圓月樹頭明草根蟲穴吟來久屋角星河落更清我媿

西垣侍臣比影寒霜鬢兩三莖

次韻答吳長文內翰遺石器八十八件

山工日斲器殊匪事樵牧掘地取雲根剖堅如剖玉食具
與果具待賓良有勗亦將茶具并飽啜時出俗公何都贈
予金多不入目我家固宜之瓦椀居漏屋得此尤稱窮客
來無不足唯應赤脚婢收拾怨常酷夏席堆青蘘冬盤釘
旨蓄竟無梁肉饌甚媿蕭家錄

送番禺杜杆主簿

行識枕榔樹初窺翡翠巢地蒸蠻雨接山潤海雲交訟少
通華語蟲多入膳庖不須思朔雪梅吐臘前稍

次韻和永叔飲余家詠枯菊

今年重陽公欲來旋種中庭已開菊黃金碎翦千萬層小

樹婆娑嘉趣足，髡頭插藥惜光輝。酒面浮英愛芬馥，旋種旋摘趁時候。相笑相尋不拘束，各看華髮已垂顛。豈更少年苔色綠，自茲七十有三日。公又聯鑣入余屋，皆傍猶見舊枯叢。根底青芽歎催促，但能置酒與公酌。獨欠琵琶彈啄木，所歡坐客盡豪英。槐上凍鴟偷側目，盤中有肉鴟伺之。烏鳥不知啼，背曲諸公醉。思索筆吟吾兒暗寫千毫禿，明日持詩小吏忙。未解宿醒聊和屬。

和王景彞正月十四日夜有感

燈光暖熱夜催春，天半樓開飲近臣。馳道橫頭起山岳，露臺周匝簇車輪。隔簾艷色多相照，下馬輕豪各競新。我已暮年殊趣嚮，濃油一盞按邊身。

次韻和永叔雨中寄原甫舍人

賴得春巢鷺未歸，高簷終日雨。衰衰紉籠芳草踏青後，欲打梨花寒食時。美景已嗟空過盡，名園猶許悞相隨。錦鞍切莫九衢去，拍拍一如鵝鴨池。社日曾慎赴北園

和劉原甫復雨寄永叔

塔下青苔欲染衣，晴光纔漏又霏微。衝風鷺子啣泥去，隔樹鶉鳩嗔婦歸。乍冷乍陰將禁火，自開自掩不關扉。渾身酸削懶能出，莫怪與公還往稀。

送羅職方知秀州

陸雲嘗誇千里莼，便輕羊酪同埃塵。君今得郡正千里，已患無羊厭此珍。乃知南北各所樂，乘舟不如乘馬。惡水邊不見秦羅敷，縱有西施肌肉薄。使君事事未稱意，綠水芙蓉定何若。

寄懷劉使君

敬

昔我從仲父三年在河內春游丹水上花竹弄粉黛人誇
走馬來盡眼看沒背薄暮半醉歸插花紅簇隊使君今少
年時往勸耕未安行過樹下野杏正破類何不學山公酪
酏還倒載令人知使君心膽不瑣碎切莫懲婦翁慷慨臨
并代一朝由謫謫雖去民苦愛實計幸不幸豈較進與退
因書寄此懷繩墨老且悔

寄汶上

大第未嘗身一至人猜巧宦我應非彈冠不讀先賢傳說
劔休更短後衣瘦馬青袍三十載故人朱轂幾多違功名
富貴無能取亂石清泉自憶歸

諭鳥

百鳥共戴鳳惟欲鳳德昌願鳳得其輔咨爾孰可當百鳥
告爾間惟鳥最靈長乃呼鳥與鵲將政庶鳥康鳥時來佐
鳳署置且非良咸用所附已欲同助翱翔以鷺代鴻鴈傳
書識暄涼鸚鵡代鸚鵡刺舌說語詳禿鷄代老鶴乘軒事
昂藏野鴉代雄雞爪背稱擅場雀豹代鵬鶚搏擊肅秋霜
蝙蝠嘗入幕捕蚊夜何忙老鴟啄臭腐盤飛使游揚鴝鵒
與梟鳩待以為非常一朝百鳥厭讒鳥出遠方鳥伎亦止
此不敢戀鳳傍養子頗似父又貪噪豺狼為鳥鳥不伏獸
有為爾戒莫如且斂翮休用苦不量吉凶豈自了人事亦
交相

答裴送序意

我欲之許子有贈為我為學勿所偏誠知子心苦愛我欲

我文字無不全居常見我足吟詠乃以述作爲不然始曰
子知今則否固亦未能無諭焉我於詩言豈徒爾因事激
風成小篇辭雖淺陋頗刻苦未到二雅未忍捐安取唐季
二三子區區物象磨窮年苦苦著書豈無意貧希祿廩塵
俗牽書辭辯說多碌碌吾敢虛語同後先唯當稍稍緝銘
誌願以直法書諸賢恐子未諭我此意把筆慨嘆臨長川

薛九公期請賦山水字詩

薛公堂懸山水字請我試作山水詩呼童磨墨慰君意強
作安得有好辭昔年曾是杜陵客東城水上橫此碑字方
數尺形勢健豈似取次筆畫爲東城父老語於我推本朔
自開元時不知當時何所用費功鑿刻爲瓌奇我去長安
十載後此石誰輦來京師苑中構殿激流水暮春脩禊浮

酒卮是時詞臣出不意酒半使賦或氣萎只斜鳴蹕不可
駐未就引去加鞭笞脫我幸得預此列玉階立寫從然其
今雖下筆不稱意已書滿幅令君嗤

韓欽聖問西洛牡丹之感

韓君問我洛陽花爭新較舊無窮已今年誇好方絕倫明
年好更還相比君疑造化特着意果乃區區可羞耻嘗聞
都邑有勝意旣不鍾人必鍾此由是其中立品名紅紫葉
繁矜色美萌芽始見長蒿萊氣焰旋看壓桃李乃知得地
偶增異遂出羣葩號奇偉亦如廣陵多芍藥閭井荒殘無
可齒淮山邃秀付草樹不產髦英產佳卉人於天地亦一
物固與萬類同生死天意無私任自然損益推遷寧有彼
彼盛此衰皆一時豈關覆燾爲偏委呼兒持紙書此說爲

我緘之報韓子

初冬夜坐憶桐城山行

我昔吏桐鄉窮山使屢躡路險獨後來心危常自怯下顧
雲容容前溪未可涉半崖風颭然驚鳥爭墮葉脩蔓不知
名丹寶坻在茨林端野鼠飛緣挽一何捷馬行聞虎氣豎
耳鼻息歛遂投山家宿駭汗衣尚浹歸來撫童僕前事語
妻妾吾妻常有言艱勤壯時業安慕終日閒笑媚看婦靨
自是甘努力于今無所懾老大官雖暇失偶淚滿睫書之
空自知城上鼓三疊

雪後資政侍郎西湖宴集偶書

潭心不凍處鴈鷺自相依積雪正無際因風忽起飛初驚
如避弋復下信忘機偶得從公飲聊書此景歸

元日

昔遇風雪時孤舟泊吳埭江潮未應浦盡室坐相對行庖
得海物鹹酸何瑣碎久作北州人食此欣已再是時值新
歲慶拜乃唯內草率具盤餐約畧施粉黛舉杯更獻酬各
爾祝鮐背咀橘齒病酸目已驚老態豈意未幾年中路苦
失配嘉辰衆所喜悲淚我何耐曩歡今已哀日月不可賴
前視四十春空期此身在世事都厭聞讀書未忍退過目
雖已忘寧捨心久愛何當往京口竹里翦荒穢行歌樂暮
節薪菽甘自刈

寄滁州歐陽永叔

昔讀韋公集固多滁州詞爛熳寫風土下上竄幽奇君今
得此郡名與前人馳君才比江海浩浩觀無涯下筆猶高

帆十幅美滿吹一舉一千里只在頃刻時尋常行舟艫傷
岸撐牽疲有才苟如此但恨不勇爲仲尼著春秋貶骨嘗
苦筭後世各有史善惡亦不遺君能切體類鏡照嫫與施
直辭鬼膽懼微文姦魄悲不書兒女書不作風月詩唯存
先王法好醜無使疑安求一時譽當期千載知此外有甘
脆可以奉親慈山蔬采笋蕨野膳獵麋鱸膾古來美臯
芻今且推夏果亦瑣細一一舊頗窺圓尖剝亦實青紅摘
林枝又足供宴樂聊與子所宜慎勿思北來我言非狂癡
洗慮當以淨洗垢當以脂此語同飲食遠寄入君脾

樊推官勸予止酒

少年好飲酒飲酒人少過今旣齒髮衰好飲飲不多每飲
輒嘔泄安得六府和朝醒頭不舉屋室如盪漚取樂反得
病衛生理則那予欲從此止但畏人譏訶樊子亦能勸苦
口無所阿乃知止爲是不止將如何

感春之際以病止酒水丘有簡云時雨乍晴物景鮮
麗疑其未是止酒時因成短章奉答

東風固無迹何處見春歸土逐草心坼雨兼花片飛雖憐
柔甲長只恐艷條稀君但惜晴景休言止酒非

答宋學士次道寄澄心堂紙百幅

寒溪漫楮春夜月敲冰舉簾勻割脂焙乾堅滑若鋪玉一
幅百錢曾不疑江南老人有在者爲予嘗說江南時李主
用以藏秘府外人取次不得窺城板猶存數千幅致入本
朝誰謂奇漫堆閑屋任塵土七十年來人不知而今制作
已輕薄比於古紙誠堪嗤古紙精光肉理厚適歲好事亦

稍推五六年前吾永叙贈予兩軸令寶之是時頗叙此本
未遂號澄心堂紙詩我不善書心每愧君又何此日幅遺
重增吾赧不敢拒且置縑箱何所爲

春寒

春晝自陰陰雲陰薄更淡蝶寒方斂翅花冷不開心亞樹
青帘動依山片雨臨未嘗辜景物多病不能尋

答韓三子華韓五持國韓六玉汝見贈述詩

聖人於詩言曾不專其中因事有所激因物興以通自下
而磨上是之謂國風雅章及頌篤刺美亦道同不獨識鳥
獸而爲文字工屈原作離騷自哀其志窮憤世嫉邪意寄
在草木蟲邇來道頗喪有作皆言空煙雲寫形象葩卉詠
青紅人事極諛諂引古稱辯雄經營唯切偶榮利因被蒙

遂使世上人只曰一藝充以巧此戲奕以聲喻鳴桐嗟嗟
一何陋甘用無言終然古有登歌緣辭合徵宮辭由士大
夫不出於瞽矇予言與時輩難用猶篤癡雖唱誰能聽所
遇輒瘖聾諸君前有贈愛我言過豐君家好兄弟響合如
笙叢雖欲一一報強說恐非衷聊書頽頑石不敢事磨礱
前以詩答韓三子華後得其簡因叙下情

前者報君詩妄說良有以昔予在京師多爲人所詆短章
然無工實未甘藝比因君有過褒聊且發憤悱何言敢爲
師乃是貴不避平常遭口語攢集猶毒矢此論苟一出是
非必蜂起偶爾道瘖聾多疑已竊指雖恃不欺衷恨未致
速死安得二頃田歸耕曷爲耻誰能事州郡鷄狗徒聒耳
汝州王待制以長篇勸予復飲酒因謝之

前因飲酒多乃苦傷營衛嘔血踰數升幾乎成病肺上念
父母老下念妻兒稚不死常抱病於身寧自貴樊子來勸
我止酒良有謂公復遺我詩責我詞甚毅指以年齒哀非
酒何養氣春飲景可樂夏飲暑可避秋飲心忘愁冬飲暖
勝被醉歌人不怪醉言人不忘在酒功實多止酒酒何罪
假如壽九十今子已半世不飲徒自苦未必止爲利胡日
妄與真恐乖達者意屈原吟澤畔方悟獨醒累子居今之
時安免人病議是以告子勤子守亦謬計我讀纔一過不
覺顏起愧自茲願少飲但不使疾熾書此以謝公公言誠
有味

洛陽牡丹

古來多貴色歿去定何歸清魄不應散艷花還所依紅樓

金谷妓黃值洛川妃朱紫亦皆附可言人世稀

和歐陽永叔啼鳥十八韻

南方窮山多野鳥百種巧口乘春鳴深林參天不見日滿
壑呼嘯誰識名但依音響得其字因與爾雅殊形聲我昔
曾有禽言詩粗究一二啼喙情苦竹岡頭泥滑滑君時最
賞趣向精餘篇亦各有思致恨未與盡衆鳥評君今山郡
日無事靜聽鳥秦如交爭提壺相與來勸飲戴勝亦助能
勸耕我念此鳥頗有益如欲使君勤以行勸耕幸且強職
事勸飲亦冀無獨醒杜鵑蜀魄哭歸去小人懷土慎勿聽
城頭春鳩自謂拙鵲巢輒處安得平高窠喬木美毛羽嘒
吮葉底無如鶯口中調簧定何益下啄蚯蚓孰曰清自餘
多類不足數一一推本煩神靈我居中土別無鳥老鴉鸛

鶴方縱橫教雞叫噪日羣集豈有勸酒花下頽願君切莫
厭啼鳥啼鳥於君無所營

和王仲儀詠瘦二十韻

汝水出山險汝民多病瘦或如鷄精滿或若猿嘍並女慙
高掩襟男大濶裁領飲水擬注壺吐詞侔有鯁樗里旣已
聞杜預亦不幸秦人號智囊吳瓠繫狗頸臘腕常住頽伶
仃安及脛只欲仰問天無由俯窺井挾帶歲月深冒犯風
霜冷厭惡雖自知剖割且誰官不唯羞把鏡仍亦愁弔影
內燎煩羊曆外砭費針穎在木曰楠榴剝之可爲皿此誠
無所用旣有何能辟音辟膨脝厠無首臃腫異臚頂難將面
目施可與胎胞逞賢哉臨汝守世德調金鼎氓俗雖醜乖
教今日脩整風土恐隨遷晨昏憂屢省儻欲便慈顏名城
不難請

憶吳松江晚泊

念昔西歸時晚泊吳江口回堤遡清風淡月生古柳夕鳥
獨遠來漁舟猶在後當時誰與同涕憶泉下婦

使者自隨州來知尹師魯寓止僧舍語其處物景甚

詳因作詩以寄焉

驛使話漢東故人遷謫處所居雖非居有樹卽嘉樹日膳
或雞狔時蔬多筍芋夜堂虵結蟠畫戶鵲噪聚著書今未
成愛靜已得趣予欲訪其人炎蒸未能去

憶將渡楊子江

月暈知天風舟人夜相語平明好挂帆白浪須出浦此身
猶在吳歸夢預到楚今日念同來吾妻已爲土

依韻和晏相公

微生守貧賤文字出肝膽一爲清穎行物象頗所覽泊舟
寒潭陰野興入秋莢因吟適情性稍欲到平淡苦辭未圓
熟刺口劇菱芡方將挹溟海器小已激灑廣流不拒細愧
抱獨慊慊疲馬去軒時戀嘶芻秣減茲繼周南篇短撓寧
及艦試知不自量感涕屢揮摻

述中寄上尚書晏相公二十韻

驚颺入林鴉亂飛舞空落葉相追隨秋權摧物不見跡但
使萬古生愁悲登山臨水昔感別身作旅人安得宜單舟
匹婦更無婢朝食每愧婦親炊平生獨以文字樂曾未敢
耻貧賤爲官雖寸進實過分名姓已被賢者知疎愚生不
謁豪貴守此退縮行將衰穎州相公乘道德一見不以論

高卑久調元化費精力猶且未倦刪書詩唐之文章剔蕪
穢纖悉寧有差毫釐謂其耽學可與語便語淵奧祛佹疑
浮言近意不歷口直欲海窟拳蛟螭再拜膝前荷勤誨垂
橐糶載歸忘饑解艇水驛無幾舍新詩又遣牙兵持上言
行李覽物景聊可與婦陳酒卮下言狂斐頗及古陶韋比
格吾不私相公貴且事翰墨我輩豈得專遊嬉今將蒿芹
薦俎豆定亦不以微薄遺堂令有詠無巨細當因川陸舟
車貽日對順流思疾置老翁姦怯潛鱗鬚

奉和子華持國玉汝飲西軒

我誠官局冷終日事靡枯
三五四人來過慰飢渴迭相
哺留飯具麤糲薄酒旣以斟
不覺寒日沒愚妻方罷沐供

飲愧倉卒凍婢昧煎和親調首忘髯每食各驚顧誰謂不
黔突倦僕暖吾薪飢馬飽吾秣馬無歸嘶聲僕有顏色活
安穩不知疲明缸仍爲撥醉言實無次曾未窮本末諸君
競相先出口論莫奪復云天地間此能有幾達我聞顏汗
下恐後謗難遏其間常有言但未見疵鬻終當輕有若悔
目已屢眈莫入反信哉羣玉林豈得依朽枿吾心爲之然收
舌如斷割寄音謝豪俊茲蘊只圭蠹

依韻和持國新植西軒

開池臨廣衢崇崇十餘畝新軒稍偏北治圃亦西西盎中
植菡萏水不過升斗小桂未得地驗活徒插朽上乏幽禽
啼下多穴蟻走藥苗雖無補欲比山中有澆灌同一時萌
芽或先後松株不滿尺廊廟色已厚稟性久且堅物理豈
無偶椶櫚仍未大散葉纔八九夏綠與冬青各各自爲友
吾軒還處西脩竹爾後取兩莫論是非但可吟對酒

送韓八太祝歸京師求醫

少年潔而腴茸茸頰有鬚冒熱跨馬去去去天王都借問
去何謂就醫將疾驅客曰實誑我健壯其非夫敢告固不
給但怪所見愚脊者未必病病者未必癯天馬不着肉日
走萬里途山熊豈無膏養體唯恐痛滯結在於內安得形
肌膚厥貌雖美好厥疾勿須更療之欲其漸熾之非愛軀
此行不飲別安得持酒壺

同諸韓及孫曼叔晚遊西湖二首

晚日城頭落輕鞍菓下涼野蜂啣水沫舟子剝菱黃木老
識秋氣徑幽聞草香幅巾聊去檢不作楚人狂

爍電未成雨涼風先入衣青大忽開影紅日尚餘暉
蛺蝶作團起蜻蜓相戴飛嘲謔不覺夕跨馬月中歸

七月二十一夜聞韓玉

以宿城北馬鋪

暗樹秋風擺葉鳴桃枝竹簟冷逾清孤燈淡淡短亭客半
夜蕭蕭聞雨聲

得曾鞏秀才所附除州歐陽永叔書答意

客從淮上來往問故人信袖銜藤紙書題字遠已認既喜
開其封固覺減吾吝新詩不作寄乃見子所慎向來能如
今豈有得觀疊南方歲苦熱生蝗復饑饉憂心日自勞霜
髮應滿鬢知予欲東歸曉夕目不瞬貧難久待乏薄祿藉
霑潤雖爲委吏冗亦自甘以進相望未得親終朝如抱疹
裴如晦自河陽至同韓玉汝謁之

朝聞單騎歸徑走至其第扣門童僕頑拒我色甚戾不顧
遂登堂有馬堂下繫辨詐大呼卿稍應西屋際逡巡冠帶
出青綬何曳曳有似縮殼龜藏頭非得計况與二三子交
分久已締怨爾避客尤新還復新婿

鴨雛

春鴨日浮波羽冷難伏卵嘗因雞抱時託以鷄窠暖三旬
穀既坼乳毛寒脰短雞寧辨其雛翅擁情欸欸一日向水
涯所稟殊未斷泛然去中流雞呼心恹恹人之苟異懷負
義不足算有志在養毓勿論報德限

杜挺之贈端溪圓硯

雪壓古寺溪中有卧病客訪之語久清飢馬齧庭栢按頭
蠻溪硯其狀若圓璧指此欲爲贈而將助吟席非意予敢

貪既拒頗不懌大出楮中有素許當自擇強持慰勤心歸
以示朋咸哂曰豈其然爲汲寒泉滌滌彼僞飾物紙乾見
頑石清晨走髯奴無厭願求易拜賜遂如初明月懷吞蝕
微分鸚目瑩尚漬墨花碧詞答謂我愚悔復料已逆明日
未央朝執手笑啞啞

對雪憶往歲錢塘西湖訪林逋三首

昔乘野艇向湖上泊岸去尋高士初折竹壓籬曾礙過却
穿松下到茅廬
旋燒枯栗衣猶濕去愛峰前有徑開日暮更寒歸欲懶無
端撩亂入船來
樵童野犬迎人後山葛棠梨案酒時不畏尖風吹入牖更
教牀畔覓鴟夷

寄題滁州醉翁亭

琅琊谷口泉分流漾山翠使君愛泉清每來泉上醉醉纓
濯潺湲醉吟異憔悴日暮使君歸野老紛紛至但留山鳥
啼與伴松間吹借問結廬何使君游息地借問醉者何使
君閒適意借問鑄者何使君自爲記使君能若此吾詩不
言刺

送張太博通判袁州

君非身尤謫南州南方尚鬼其俗媮蚩爲鄰虎爲陬丹茅
苦竹深幽幽邑人祠鬼拜古樹竹杯一仰來烹牛牛死齧
懼常不幸誰得禁止專鋤鉤借曰未信君且往民將語怪
君聽不仰山頭有行舟

古鑑

古鑑得荒塚土花全未磨背菱尖尚在鼻獸角微訛月暗
蝦蟆蝕塵昏魍魎過但令光彩發表裏是山河

戊子三月二十一日殤小女稱稱三首

生汝父母喜死汝父母傷我行豈有虧汝命何不長鴉雛
春滿窠蜂子夏滿房毒螫與惡噪所生遂飛揚理固不可
詰泣淚向蒼蒼

蓓蕾樹上花瑩潔昔嬰女春風不長久吹落便歸土嬌愛
命亦然蒼天不知苦慈母眼中血未乾同兩乳
高廣五寸棺埋此千歲恨至愛割難斷剛性判以鈍淚傷
染衣斑花惜落蒂嫩天地既許生生之何遽困

送施景仁太博提點江南坑冶

楚山豈無銅楚匠豈不工大鑪常乏鑄碧井那得充積弊

在鄉縣孰官以利籠君今承詔行論民當得中苟能使之
發亦莫取之窮此乃事可久山溪山自通

夜泊虹縣同施景仁太博河上納涼書事

與君愛清風移榻就明月月落見星繁星繁如晝熱霑衣
輕露墜響岸崩湍齧坐思都城時誰許脚不韞

淮雨

雨脚射淮鳴萬鏃跳點起漚魚亂目濕帆遠遠來未收雲
漏斜陽生半幅

雜詩絕句十七首

自此寶應道中起慶曆七年夏

蛙行動萍葉悞觀作游魚稍稍引兩股已變科斗書
青草生水中日日隨水長水落何所依撩亂爲宿莽
有蟲託斷葑斷葑日夕流不知止息處隨天非自由

荒水浸籬根籬上蜻蜓立魚網挂遶籬野船籬外入
茸茸翦熟絲雨染燕脂暈蒲樹斂黃昏槿花無此分
青青老鏡葉下有繁實尖浪頭撥船女刺手終不嫌
岸傍草樹密往往不知名其間有啼鳥似與船相迎
青蠅何處來聚集滿盤間誰知腹中物變化如循環
水上賣瓜女摘瓜陂上田長麻已不識滿把青銅錢
買魚問水客始得鯽與魴操刀欲割鱗跳怒鬣鬣張
沙頭風雨來帖水野雲黑如觀曹公營萬弩射船側
前時雙鴛鴦失雌鳴不已今更作雙來還悲舊流水
度水紅蜻蜓傷人飛款款但知隨船輕不知船去遠
塘上挽船人塘泥濊及脛落日望前村心將道途競
燕立茅屋脊燕啣芹岸泥巢成同養子薄暮亦同棲

鵲銜高樹蟬危脇縹車響露腹不曾肥殺之嗟已枉
河畔有釣翁團泥爲甕坐想秦人聲思傾杜陵酒

褐山磯上港中泊

風惡舟難進聊依浦裏村岸潮生蓼節灘浪聚蘆根日脚
看看雨江心漸漸昏篙師知蟹窟取以助清樽

別後寄永叔

前日辭親淚又爲別友出愁極反無言欲言詞已窒荷公
知我詩數數形美述茲道日未堙可與古爲匹孟盧張賈
流其言不相昵或多窮苦語或特事豪逸而於韓公門取
之不一律乃欲存此心欲使名譽益竊比於老郊淡愧言
過實然於世道中固且異謗嫉交情有若此始可論膠漆
宿邵埭聞雨因買藕茨人迴呈永叔

秋雨雁來急夜舟人未眠亂風燈不定暝色樹相連寒屋
猛添響濕窓愁打穿明朝持藕使書此寄公前

寄許主客

昨日山光寺前雨今朝邵伯堰頭風野雲不散低侵水魚
艇無依尚蓋蓬藕味初能消酒渴蓼芳猶愛照波紅揚州
有使急迴去敢此寄聲非塞鴻

岸貧

無能事耕獲亦不有鷄豚燒蚌燂槎洙織蓑依樹根野蘆
編作室青蔓與爲門稚子將荷葉還充犢鼻褌

村豪

日擊收田鼓時稱大有年爛傾新釀酒包載下江船女髻
銀釵滿童袍毳氍鮮里胥休借問不信有官權

寄酬發運許主客

淮上秋來物意閑又乘輕舸信帆還一浮一沒水中鳥更
遠更昏天外山斜幅纏踣兵吏至濃金洒紙領珠頒欲酬
已覺不能敵盡日臨風思自慳

淮陰

青環瘦鐵纜繫在淮陰城水脰多長短林枝有直橫山夔
一足走妖鳥九頭鳴韓信祠堂古誰將跨下平

田家屋上壺

脩蔓屋頭綴大壺簷外垂霜乾葉猶苦風斷根未移收挂
煙突近開充酒具遲賤生無所用會有千金時

小村

淮潤洲多忽有村棘籬疎敗謾爲門寒雞得食自呼伴老

叟無衣猶抱孫野艇鳥翹唯斷纜枯桑水蓄只危根嗟哉
生計一如此謬入王民版籍論

泊下黃溪

黃溪晚來泊得見田家微刺艇斜陽下耕州載耒歸牛鳴
向宰犢犬喜入人衣復有返樵者檐枯翹雉肥

聞進士販茶

自此宣州至和二年五月後

山園茶盛四五月江南竊販如豺狼頑凶少壯冒嶺險夜
行作隊如刀槍浮浪書生亦貪利史笥經箱爲盜囊津頭
吏卒雖捕獲官司直惜儒衣裳却來城中談孔孟言語便
欲非堯湯三日夏雨刺昏墊五日炎熱譏旱傷百端得錢
事酒芻屋裏餓婦無糶糧一身溷齷乃自取將相賢科何
爾當

梅雨

三日雨不止蚯蚓上我堂濕菌生枯籬潤氣醜素裳東池
蝦蟆兒無限相跳梁野草侵花圃忽與欄干長門前無車
馬苔色何蒼蒼屋後昭亭山又被雲蔽藏四向不可往靜
坐唯一牀寂然忘外慮微誦黃庭章妻子笑我閉曷不自
舉觴已勝伯倫婦一醉猶在傷

汴渠

我實山野人不識經濟宜聞歌汴渠勞謾綴汴渠詩汴水
源本清隨分黃河枝濁流方已盛清派不可推天王居大
梁龍舉雲必隨設無通舟航百貨當陸馳人肩牛騾驢定
應無完皮苟欲東南蘇要省聚斂爲兵衛詎能削乃須雄
京師今來雖太平盡罷未是時願循祖宗規勿益羣息之

譬竭兩川賦豈由此水施縱有三峽下率皆匱冗資慎莫
尤汴渠非渠取膏脂

答宣城張主簿遺鴉山茶次其韻

昔觀唐人詩茶詠鴉山嘉鴉啣茶子生遂同山名鴉重以
初槍旗采之穿煙霞江南雖盛產處處無此茶纖嫩如雀
舌煎烹比露芽競收青蕪焙不重漉酒紗顧渚亦頗近蒙
頂來以遐雙井鷹掇爪建溪春剝葩日鑄弄香美天目猶
稻麻吳人與越人各各相關夸傳買費金帛愛貪無夷華
甘苦不一致精麤還有差至珍非貴多為贈勿言些如何
煩縣僚忽遺及我家雪貯雙砂甕詩琢無玉瑕文字搜怪
奇難於抱長蛇明珠滿紙上剩畜不為奢玩久手生胝窺
久眼生花嘗聞茗消肉應亦可破瘕飲啜氣覺清賞重歎

復嗟歎嗟既不足吟誦又豈加我今實強為君莫笑我耶

依韻和永叔澄心堂紙答劉原甫

退之昔負天下才掃掩衆說猶除埃張籍盧同鬪新怪最
稱東野為奇瑰當時辭人固不少漫費紙札磨松煤歐陽
今與韓相似海水浩浩山鬼鬼石君蘇君比盧籍以我特
郊嗟困摧公之此心實扶助更復有力誰論哉禁林晚入
接俊彥一出古紙還相哀曼卿子美人不識昔嘗吟唱同
樽疊因之作詩答原甫文字駛穩如刀裁怪其有紙不寄
我如此出語亦善談往年公贈兩大軸子今愛惜不輒開
是時有詩述本末值公再入居蘭臺崇文庫書作總目未
暇綴韻酬草萊前者京師競分買罄竭舊府歸鄒枚自慚
把筆粗成字安可遠與鍾王陪文高墨妙公第一宜用此

紙傳將來

夢後寄歐陽永叔

不趁常叅久安眠向舊溪五更千里夢殘月一城鷄適往
言猶是浮生理可齊山王今已貴官聽竹禽啼

送方進士遊廬山

長風沙浪屋許大羅刹石齒水下排歷此二險過湓浦始
見瀑布懸蒼崖繫舟上岸入松徑三日踏穿新蠟鞋路盤
溪谷出嶺望後山日照前山靄偶逢風雨恐衣濕側倚石
脇人相乖雨收不覺在高處却見童僕提攜偕水聲不絕
鳥聲好藥草香氣侵人懷老僧避俗去足跣野客就澗開
門闔樹崑隱映見寺刹層層杳杳躋雲階塢田將穫鳥雀
橫秋果正熟猴猿齮東林淡菴應似舊唯此足以待爾儕

子心洒落撇然往我方塵垢難磨揩

頴公遺碧霄峰茗

到山春已晚何更有新茶峰頂應多雨天寒始發芽採時
林狖靜蒸處石泉嘉持作衣囊祕分來五柳家

黃鸞

內家初上翠微宮樹裏窺人在半空笑語漸高無約束侍
臣偷望向雲中

西鄰少年今出遊東家女兒未識羞門前烏臼葉已暗日
暮問誰牆上頭

李仲求寄建溪洪井茶七品云愈少愈佳未知嘗何
如耳因條而答之

忽有西山使始遺七品茶末品無水暈六品無沉相五品

散雲脚四品浮粟花三品若瓊乳二品罕所加絕品不可
議甘香焉等差一日嘗一甌六腑無昏邪夜枕不得寐月
樹聞啼鴉憂來唯覺衰可驗唯齒牙動搖有三四妨咀連
左車髮亦足驚疎疎點霜華乃思平生游但恨江路賒
安得一見之煮泉相與誇

春日拜壠經田家

田家春作日日近丹杏破頰場圃頭南嶺翁過北嶺叫高
田水入低田流桑牙將綻霧露裊蠶子未浴箱篚收今我
還朝固不遠紫宸已夢瞻珠旒

重送楊明叔

并序

行而有以賸者助所不足也車馬子有裘服子有貨具
子有所可贈者詩言爾故先爲七言以送將以道彼美

而樂乎往也子不爲重邀予以規又作五言應其請

君將會稽去舊蹟可以嬉予因狀其美贈子臨路岐子不
以爲樂但願有以規噫吾豈無說畏子未及禪旣求不語
子吾曷忍子欺前年子渡淮夜泊洪澤湄有鬼稱使者來
告風波期子時再拜謝乃被隣船嗤逡巡鬼復至復附船
家兒怒彼慢嗤士明當使驚危船兒傷舷迴走若一足夔
翌日各解舟出浦風動旗子獨乘安流彼受橫浪吹此事
非子傳焉得他人知昨逢令弟蘊備述果不疑越俗素重
鬼慎勿啓其私子口有仁義子腹有書詩子嘗談王道怪
語固未宜近聞蘇才翁問子辟者誰得非外戚侯子怒已
豎眉今我倘得罪甘與蘇同之

過淮

侍親數數來浮汴護櫬迢迢復渡淮
旨蓄曾無御寒具細君唯有隱居
釵月痕遠入魚銜浪潮退長汀蚌
閣崖素服華顛色相似青銅不忍見
形骸

發長蘆江口

篙師施工相整衣龍女廟中來宰豨
野祝擊鼓降神語老鴉啣肉上樹飛
長江無風平似削兩槽夾舸行將歸
南國山川都不改傷心慈姥舊時磯

龍女祠祈順風

龍母龍相依風雲隨所變舟人請予
往出廟旗脚轉旗指西南歸飛帆疾
流電長蘆江口發平明白鷺洲前已
朝膳竹根盃琰不欺人世間然諾空
當面

早發大信口

犬吠知船解村墟尚閉門霜泥粘纜
尾水水閣潮痕撇撇鷓鴣去纖纖舴
舨昏梅湖到不遠寄信向田園

依韻和正仲寄酒因戲之

上字黃封誰可識偷傳王氏法應真
清淮始變醅猶薄句水新來味更醇
欲擬比酥酥少色曾持勸客客何人
紅梅雖是吾家物老去無心一醉春

清淮酒本王九傳法於山陽

閒居

讀易忘飢倦東窗盡日閒庭花昏自
斂野蝶晝還來謾數過籬筍遙窺隔
葉梅唯愁車馬入門外起塵埃

秋雨篇

秋雨一向不解休連昏接晨終窮秋
梅生不量仰天問神官夜夢言語周
日月是天之兩目忽然生翳無藥瘳
只知

淚滴爲赤子赤子豈悞天公憂天公哭霽霽洒涕落九州
地祗不敢安泥濘已沒頭乃因從容詰神官后稷今在帝
所不從前后稷知稼穡曾以筋力親田疇曷不告帝且輟
泣九穀正熟容其收蚤時不泣此時泣憂民欲活反扼喉
神官發怒鬚奮虬下土小臣安預謀恐然驚覺汗交流樹
上已聽呼雌鳩

聞永叔出守同州寄之

冕旒高拱元元上左右無非唯唯臣獨以至公持國法豈
將孤直犯龍鱗茱萸欲把人留楚苜蓿方枯馬入秦訪古
尋碑可銷日秋風原上足麒麟

送天台李令庭芝

吾聞天台久未見天台狀去海知幾里去天知幾丈峰巒
隱與出崑崙背與向雲雷反在下泉瀑反在上幽澗無窮
窺杳眇無窮望至險可悸慄至怪可駭喪石橋彎長弓跨
絕絃未放當時白道猷平步入青嶂去爲六百石亦見志
所尚子欲廣異聞可以一尋訪

十一月十二日賽昭亭神

冷雨凝雪未成雪潭空魚寒歸石穴長篙扣穴倩鯉魚寄
信山頭來奠設魚傳水鳥飛上山山大槎槎乾吹咽旋灰
起角巫鼓鳴漆俎銅盤顛牲血琵琶嘈嘈神降言福汝祐
汝無災孽西向啐飲東向迴溪心却望山崔嵬

依韻和吳正仲冬至

流光冉冉卽衰遲物趣迴還似轉規長景已知今日至孤
懷不比少年時偶陪上閣鴛鸞後且與南州父老期况有

春禾新酒熟百分休放手中卮

依韻答吳正仲罷飲

君辭予家傾蟻醅自有嘉味須持來青篋絡餅方出戶紅
粧侑席已邀杯窮愁一飲猶關分側望羣賢不可陪靜坐
紙窗無所得只將文字眼前堆

依韻諸公尋靈濟重臺梅

梅要山傍水次栽非同弱柳近童臺重重葉葉花依舊歲
歲年年客又來雖愛千枝競繁密還嗟短髮已衰頰郎官
博士留車騎擁蔽脩篁為斫開

和正仲再和罷飲

吳味期君強飲開楚醅因我破愁來何言合美將虛館却
憶爭妍就捧杯夜霰已先庭雪集單衣難與毳裘陪踐盟
幾欲驅車去塵事無端日日堆

和韻三和戲示

琴箏畫蛤瓦缸陪海若淮壩各寄來將學時人鬪牛飲還
從上客舞娥杯蓬蒿自有蔣生樂珠翠寧容鄭氏陪莫計
寒暄與風雪古來黃土北邙堆鄭康成與盧子幹同事馬融融後堂有珠翠之會康成不得預焉

依韻四和正仲

四和還如九醞醅更醇更美未嫌來相逢莫作兩般眼一
飲不辭三百杯嵇阮當時無俗慮山王雖貴亦能陪如今
世態尤堪薄只把官資滿眼堆袁招飲鄭云自旦至暮三百餘杯

依韻和吳正仲聞重梅已開見招

難開密葉不因寒誰翳鷓兒短羽攢猶是去年驚目艷不

知從此幾人觀重重好藥重重惜日日攀枝日日殘我爲
病衰方止酒願攜茶具作清歡

朝

木鑲初開水上城竹籬深閉日光生青苔井畔雀兒鬪烏
白樹頭鴉舅鳴世事但知開口笑俗情休要着心行是非
不道任挑撻唯憶當時阮步兵

東溪

行到東溪看水時坐臨孤嶼發船遲野鳧眠岸有閑意老
樹着花無醜枝短短蒲茸齊似翦平平沙石淨於篩情雖
不厭住不得薄暮歸來車馬疲

送吳正仲婺管歸梅谿待闕

山水東陽去未去朋親茗雪朝復朝更無越相逃名舸猶
看吳王送女潮海燕歸齊聲滿屋谿梅開過子生條明年
十月吏迎處七里灘前棹奏簫

志來上人寄示醑醑花并壓塲茶有感

京都三月醑醑開高架交垂自爲洞素葉層層紫葢香釀
歸光祿春生甕東陌西池走鈿車芳林廣囿飛朱轡二年
不到大梁城江邊淚滴肝腸痛况茲齒髮漸衰老已是憂
愁不如衆宣城此寺來上人獨有一叢盤嫩蕞去歲游吳
求不得今朝還喜自持送眼底雖同往日看樽前所憶皆
成夢又置新茶采雨前烏鶻壓塲雲色弄對花却酒煮香
泉強詠才慙非白鳳

次韻和吳季野題岳上人澄心亭

空山舊逕綠苔滿古寺齋盂白薤蒸暑雨坐中飛漠漠野

泉林外落層層從來勝絕皆離俗未有幽淡不屬僧唯愛
溪頭一尋水莫聞流浪莫聞澄

答宣闈司理

六經義趣深傳訓或得失後人語雖淺辨識猶百一歐陽
最知我初時且尚窒比以爲橄欖廻甘始稱逆老於文學
人尚不卽究悉宜乎與世士橫爾遭詬啣誓將默無言負
暄方抱膝非非孰是是都莫答問詰歲暮宜叅軍辭如鮑
昭逸粲然傾明珠褒我頗過實便言楚江萍光彩俾旭日
自慚流浪蹤不得蒿芹匹復爲苦硬句酬報強把筆

依韻和丁元珍見寄

我從江南來挂席江上正輕舟自行速不與風力競乃省
少時學勉強無佳興初如弄機杼未解布絲經利器昧其
持或反授人柄及親賢豪游所尚志已定不厭朝市喧不
須山林靜不爲煦煦妍不爲巖巖水遇物理自暢區處劇
操令仍類楚野筠忽從孤根迸便成翠琅玕久與風霜硬
雖然達吾真誰復究畢竟世間忘坦途盡欲求密徑哂我
是疎宜乎今蹭蹬蹭蹬誠可嗟所偶亦已併晚逢二三
友喜飲恨多病道路何遑廻季秋越春孟平生景慕者邂
逅出天幸接迹猶謂榮况此聲顏並實慙寡時用又顧無
奇行愛之不忍去自且還至暝在昔濁世賢徒知清酒聖
但用醉爲娛一老少不更稍思桃源人翩爾乘漁艇尋花
逐水往豈念衰與盛歌謳非俗情山響自答應以此謝君
勤微言期略聽袞袞不足爲試共幽人評

泰州王學士寄車螯蛤蜊

車螯與月蛤寄自海陵郡謂我抱餘醒江都多美醞老來
飲不滿一醉已關分甘鮮雖所嗜易飲亦莫問嬌女巧收
設燕脂合眉暈貧奩無金玉狼藉生恚忿妻孥喜食之婢
妾困埽拚行當至京華耳目飽塵坌此味爽口難書爲厭
者訓

依韻和孫都官河上寫望

河上風烟愛此邦吳艘越舸不相降魚鯉轟轟橋邊市花
暗滾滾竹裏窗蹴踘漸知寒食近鞦韆將立小鬟雙年光
取次須偷賞何用功名節與幢

依韻和許待制偶書

曉雨射船珠瀉盤平明水上舞英殘鬪雞蹠惡輕泥濕調
馬蹄翻軟土乾溪屋鷺巢將欲補密房蠶蟻尚憂寒爲言

楚客甘蔬菽白芷香牙長嫩珊

依韻和春日偶書

甕面春醅壓嫩藍盤中鵝鶩亦肥甘正宜醉夢輕爲蝶苦
怕酬詩密似蠶病起羊公方隱几歸來陶令只乘籃河堤
古木欣欣暗野水新秧拍拍滄已向官資隨分足莫將忠
憤等閑談况於世上諸般厭不作人間一例貪陋巷自知
當退縮權門誰解更趨叅高低趣向難爲合冷暖情懷固
飽諳勉意妻兒猶苟祿強顏冠冕奉抽簪唯公恩遇留連
召頻對樽罍也負慙

依韻和禁烟近事之什

狂風暴雨已頻過近水棠梨着未多窈窕踏歌相把袂輕
浮賭勝各飛壻閑牽白日游絲颺細幕黃金舞帶拖小苑

芳菲花鬪藥華堂
嘲哢鸞爭窠西州駿馬頭如剝南國佳人頸似瑳
結客追隨傾畫榼分朋游樂藉青莎鞦韆競打
遺鈿翠芍藥將開翦纈羅我病乞求新火炙無心更聽竹
枝歌

觀邵不疑學士所藏名書古畫

野性好書畫無力能自致每遇高趣人常許出以視邵侯
多奇玩留我特開筭首觀阮與杜輿上瞑目醉阮籍韓幹
貌四馬臨流解鞍轡花驄照夜白止側各畜意繫衣穿袴
靴坐立皆廐吏精神宛如生于腮似穿鼻梅雞徐熙花竹
間寒雀睡逸少自寫真對鏡絕相類數本失姓名古胡并
老驥山水樹石硬荆關藝能至關巨然李成者落筆愈
奇異人物張僧繇雖傳恐非是其跡又莫究摸搭似未備

周秦以來書行草楷篆隸聲名舊烜赫一一果可喜邵侯
愛我曹威使紙尾記况侯有古學小字刻珉翠各贈墨本
歸懷寶誰肯忌

將赴表臣會呈杜挺之

莫怪去遲遲予心君亦知膝前嬌小女眼底寧馨兒學語
渠渠問牽裳步步隨出門雖不遠情愛未能移

高車再過謝永叔內翰

世人重貴不重舊重舊今在歐陽公昨朝喜我都門入高
車臨岸進船篷俯躬拜我禮愈下騶徒竊語音微通我公
聲名壓朝右何厚於此瘦老翁笑言啞啞似平昔妻子信
說如梁鴻自茲連雨泥沒脛未得謁帝明光宮冒陰履濕
就稅地親賓未過知巷窮復聞傳呼公又至黃金絡馬聲

龍龍紫袍寶帶照屋室飲水啜茗當清風邀以新詩出古
律霜髯屢頷搖寒松因嗟近代貴莫比官爲司空仍侍中
今成冢丘已寂寞文字豈得留無窮以此易彼可勿媿浮
榮有若送雨虹須臾斷滅不復見唯有明月常當空况我
學不爲買祿直欲到死攀軻雄一飯足以飽我腹一衣足
以飾我躬老雖得職不足顯願與公去驩樂同驩樂同治
園田穎水東

李審言相招與刁景純周仲章裴如晦馮當世沈文
通謝師厚師直會開寶塔院

自君命我飲朝暮雨傾瓦城東與城北大道泥沒馬敢忘
主人勤顛撲困馭者衆客亦如期陳肴藉蘭若馮裴與沈
謝辯論過終賈刁周事老成危坐言語寡酒半時謔劇揣
狀類模寫或譏項髮禿或指舌端俊或將冠帶身勸作梁
武捨謂我大耳兒此實已見假又効井市態屈強體非雅
順風手沙沙逆風口哆哆竟席屢絕倒去忌肝膽瀉規規
豈無儕達識高天下

陸子履見過

劉郎謫去十年歸長樂鐘聲下太微屈指故人無曩日平
明騎馬扣吾扉論情論舊彈冠少多病多愁飲酒稀猶喜
醉翁時一見攀炎附熱莫相譏

重送周都官

水上朱樓畫角鳴濛濛雨裏榜舟輕未逢甫里先生謁多
見吳興太守迎荷葉半黃蓮子老霜苞微綠橘林明十年
不到風烟改君去將詩與畫評

送李載之殿丞赴海州推務
瓜蔓水生風雨多吳船發棹唱吳歌
槎從秋漢下應快人
憶故園歸奈何世事靜思同轉轂
物華催老劇飛梭
茶官到有清閑味海月團團入酒罍

和吳冲卿學士石屏

吳夫子佩銀龜乘天馬素怪奇
忽得號略一片石其中白色圓如規
又有樹與鳥畫手雖妙何能爲吳乃持問歐陽
公比公曩獲尤可疑疑不爲辨賦以詩
詩辭粲粲明星垂復遣賚來使我和坐上鉅公
傍睨之范侯實有楊雄學咸云此理難究推我歸滌慮反覆思義雖不經聊解頤
月與太陽合朔時陽鳥飛上桂樹枝枝上作窠生羣兒人不知天公天公欲俾世間見影着石面如粘繭鳥旣不得去川

亦不可移留爲千古作好玩慎勿傾樸同玉碑

時在唐書局與歐陽

永叔汪元叔范景仁會食得所示詩

送薛氏婦歸絳州

在家勗爾勤女功無不喜旣嫁訓爾恭恭已乃遠耻我家本素風百事無有侈隨宜具奩箱不陋復不鄙當須記母言夜寐仍夙起慎勿窺窗戶慎勿輒笑毀妄非勿較競醜語勿辨理每順舅姑心况逆舅姑耳爲婦若此能乃是儒家子看爾十九年門閭未嘗履一朝陟太行悲傷黃河水車徒望何處哭泣動隣里生女不如男天親反由彼

永叔蒼賦車螯

素唇紫錦背漿味壓蚶菜海客穿海沙拾貯寒潮退王都有美醞此物實當對相去三千里貴力致以配翰林文章

宗彘鮮尤所愛旋圻旋沽飲酒船如落埭殊非北人宜肥
羊噉齧塊

歐陽永叔王原叔二翰林韓子華吳長文二舍人同

過弊廬值出不及見

十二月七日

枯竹爲門扉不可容車騎况如鄭廣文無檀藉賓位窮冬
月破七貴客聯玉轡傳騶肅里閭下榻呼童稚問我何所
往共留墻上字兒愚不知誰金章言照地旣屈卿大夫恨
莫親帶篲星躔回已高麟趾寧復至戢戢鄰巷居相見竊
自喟豈料瘦老翁能令賢達至昔時蓬蒿徑安有此盛事

還吳長文舍人詩卷

松液化茯苓又因爲琥珀遇物必得形毛髮曾不隔君子
亦豹變其文蔚可觀个者逢吳侯滿腹貯經籍噴吐五色
霓自堪垂典冊詩教始二南皆著賢聖跡後世竟翦裁破
碎隨刀尺我輩強追倣畫龍成蜥蜴有唐文最盛韓伏甫
與白甫白無不包甄陶咸所索侯初守二郡山水多助益
升高觴嘉賓賦筆速鷹翻葺書成大軸許我觀琮璧真物
固易辨恨無百金易借從懷袖歸誦玩廢朝夕譬如游國
都愀怳失阡陌苦吟三十年所獲唯巾幘豈比夸受降甲
齊熊耳積重見元和風珠玉敵海舶自慙寒餓爲何張空
避席

莫登樓

莫登樓脚力雖健勞雙眸下見紛紛馬與牛馬矜鞍轡牛
服韉露臺歌吹聲不休腰鼓百面紅臂襦先打六么後梁
州棚簾夾道多天柔鮮衣壯僕穉髭虬寶樹阿叱倚王侯

夸妍鬪艷目已偷天寒酒醺誰爾俯倚檻心往形獨留有
此光景無能游粉署深沉空翠幃青綾被冷風颼颼懷抱
既如此何須望樓頭

依韻和永叔勸飲酒莫吟詩雜言

我生無所嗜唯嗜酒與詩一日舍此心腸悲名存貴大不
輒思甌空釜冷不俛眉妻孥凍饑數恚之但自吟醉與世
違此外萬事皆莫知王公謁請衆去早既衰愈懶身到遲
日高倦僕顏色沮况騎瘦馬兩耳垂厭此勞苦不喜出唯
有文字時能爲諸公尚恐竭智慮勤勤勸飲莫我卑再拜
受公言竊意公矯時只愛詩謂余癡

出省有日書事和永叔

辭家綵勝人爲日歸路梨花雨合晴庭下鞦韆應未拆籠
中鸚鵡卽聞聲千門走馬將看旆廣市吹簫尚賣飴已是
瓊林芳卉晚不須游處避門生

上馬和公儀

煙火千門曉欲開五花驕馬官徘徊井閭已是經時隔親
舊全如遠別來帝闕重看多氣象天街新霽少塵埃振冠
浣服無容久便見池門放榜催

和楚屯田同曾子固陸子履觀予堂前石榴花

堂下一匹鄭虔馬欄邊兩株安石榴但能有酒邀佳客亦
任狂花落素甌俗女紅裙無好色主人白髮自侵頭欲歌
翠樹芳條曲已去洛陽三十秋

呂晉叔著作遺新茶

四葉及王游共家原坂嶺歲摘建溪春爭先取晴景大窠

有壯液所發必奇穎一朝團焙成價與黃金逞呂侯得鄉
人分贈我已幸其贈幾何多六色十五餅每餅包青蕩紅
籤纏素綵屑之雲雪輕啜已神魄惺會待嘉客來侑談當
晝永

送畢甥之臨邛主簿雜言

自我歷官三十年有脚未曾行蜀川李白嘗言道之艱險
長嗟難劇上青天鳥悲猿嚎馬蹄脫苔梯雨棧愁傾顛蒼
崖下窺不見底但聽雷聲輓石懸湍濺曉盤青泥上高煙
暮盤青泥到下泉劍閣如劍巉然割腸刺眼今古連爾去
三千九百里巴山小馬烏皮韉一婦一奚行李單家具日
貨能幾錢人皆畏避不敢往此獨敢往何所便况是初宦
無遠適心意自許非由銓異乎哉我今送爾徒哀憐

送王介甫知毗陵

吳牛常畏熱吳田常畏枯有樹不蔭犢有水不滋穠孰知
事春農但知急秋租太守追縣官堂上怒奮鬚縣官促里
長堂下鞭朴俱不體天子仁不恤黔首逋借問彼爲政一
一何所殊今君請郡去預喜民將蘇每觀二千石結束辭
國都絲韉加錦緣銀勒以金塗兵吏擁後隊劔槌盛前驅
君又不若此革轡障泥烏款行問風俗低意騎更駑下情
靡不達略細舉其麤曾官爲衆異亦罔爲世趨學詩聞已
熱愛棠理豈無

永叔內翰遺李太博家新生鴨腳

北人見鴨脚南人見胡桃識內不識外疑若橡栗韜鴨脚
類綠李其名因葉高吾鄉宣城郡每以此爲勞種樹三十

年結子防山徐剝核手無膚持置官省曹今喜生都下薦
酒壓葡萄初聞帝苑夸又復主第褒纍纍誰採掇玉椀上
金釐金釐文章宗分贈我已叨豈無異鄉感感此微物遭
一世走塵土鬢顛得霜毛

陸子履示秦篆寶

其文曰二十六年皇帝盡并兼天下諸侯黔首大安號爲皇帝乃詔丞相斯館法度量則不一嫌疑者皆明一之

秦旣并諸侯斯乃一度量鑄寶以永傳萬世俾勿喪精銅
不生花小篆著丞相一沒咸陽宮千秋事更王陸君居洛
城客有來渭上曰因農人耕發壞破古藏遂獲此物還文
完字何壯始號爲皇帝立語已超曠意將愚黔首爨起危
博浪其後同玉璽不隨驪山葬今蓄於君家徒爾資奇尚
物以用爲珍異時皆似妄

聽文都知吹簫

晏虞部遺求一見之

虞舜已去蒼梧野秦女驂鸞無復下簫管人間不解傳帝
樂部中能亦寡欲買小鬟試教之教坊供奉誰知者晏識
文公始致來勸接賤生宜強且乃呼側坐吹一曲驚顧頓
嘶堂下馬吾妻閨中聞不聞稚女扳簾笑嬌妣未敢多聽
便遣還贈飲單盃向身瀉

依韻和永叔久在病告近方赴直道懷見寄二章

浴堂深殿近皇居秋夕詞臣直宿初宮女穿針爭落月官
奴持燭看殘書萬家乞巧心無盡斜漢飛光望有餘枕上
江山夢猶熟五更寒雨過簾疎

玉轡龍羸出絳宮青槐馳道曉烟中塵頭尚裊洗車雨馬
耳前趨吹鬣風聞說自將身許國不須仍以醉爲公我今

才薄都無用六十棲棲未歎窮

哭孫明復殿丞

自古春秋學皆知不可過生前恩禮少歿後薦章多妻子
將焉託田園有幾何汝陽秋樹裏黃鳥謾聽歌

依韻和永叔秋日東城郊行

郊原物老莽然中寓興驅車向國東夾道名園迷屈曲歷
枝秋實亂青紅寒畦覆綠將收菜野蝶雙飛尚繞叢田父
欣來問行幸依稀還似鬪鷄翁

和楊直講夾竹花圖

桃花夭紅竹淨綠春風相間連溪谷花留蜂蝶竹有禽三
月江南看不足徐熙下筆能逼真畫成纔六幅萼繁
葉密有向背枝瘦節疎有直曲年歲粉剝見墨縱描寫工
夫始驚俗從初李氏國破亡圖書散入公侯族公侯三世
多衰微竊負檐頭由婢僕太學楊君固甚貧直緣識別爭
來鬻朝質絺袍暮質琴不憂明日鐫無粥裝成如得驪頰
珠誰能更問龍牙軸竹真似竹桃似桃不待生春長在目

觀韓玉汝人貢奉圖

時世重古不重新破圖誰畫舊人臂鷹捧盤犀利水鐵
鎖獅子同麒麟翹翹雉尾插頭上深目鉅鼻青搭巾塗朱
點綠筆畫大筋骨怒露蠻祠神茜袍白馬韓公子從何得
此來秘珍定應海客遠爲贈中國未覩難擬倫公子自言
吳生筆吳筆精勁瘦且勻我恐非是不敢贊退歸書此任
從嗔

依韻和永叔戲作

琵琶轉撥聲繁促學作饑禽啄寒木木蠹生蟲細穴深長
啄敲鏗未充腹龍弦疊響入衆耳發自溪林客空谷上弦
急逼下弦清正如塘螂捕蟬聲坐中賓歡呼酒飲門外客
疑將欲行主人語客客莫去彈到古樹裂丁丁內賓外客
曾未聽乍聞此曲無不驚還憶昭君入
馬鳴安知如今有樂事能使女奚飛玉觥女奚年小殊流
俗十月單衣體生粟言事關西楊廣文廣文空腹貪教曲
曲奇譜新偷法部妙在取音時轉軸翰林先生多所知又
笑畫圖收滿屋不宥那錢買珠翠任從堆插塔前菊功曹
時借乃許出他日求觀龜殼縮我嗟老鈍不如渠幸得交
朋時借娛但樂休計有與無

得王介甫常州書

斜封一幅竹膜紙上有文字十七行字如瘦棘攢黑刺文
如溫玉爛虹光別時春風吹榆筴及此已變蒹葭霜道途
與弟奉親樂後各矢子懷悲傷到郡紛然因事物舊守數
易承蔽藏搜姦證繆若治絮蚤虱盡去煩爨湯事成條舉
作書尺不宥勞人魚腹將魚沉魚浮任所適偶能及我爲
非常勤勤問我詩小傳國風纔畢葛屨章昔時許我到聖
處且避俗子多形相未卽寄去慎勿怪他時不惜傾箱囊
知君亦欲此從事君智自可施廟堂何故區區守黃卷蠹
魚尚耻親芸香我今正值鴈南翔報書與君倒肺腸直須
趁此筋力強炊粳烹鱸加桂薑洞庭綠橘包甘漿舊楚黃
橙綿作瓢東山故游攜舞娘不飲學舉黃金觴谿如罨畫
水泱泱刺船靜入白鷺傍菱葉已枯鏡面涼月色飛上白

石牀坐看魚躍散星芒左右寂寂夜何長烏棲古曲傳吳
王千年萬年歌未央莫作腐儒針膏肓莫作健吏繩餓狼
儻如龔遂勸農桑儻如黃霸致鳳皇來不來亦莫愛嘉祥
得雷太簡自製蒙頂茶

陸羽舊茶經一意重蒙頂比來唯建溪團片敵湯餅顧渚
及陽羨又復下越茗近來江國人鷹爪夸雙井凡个天下
品非此不覽省蜀芽久無味聲名謾馳騁因雷與改造帶
露摘牙穎自煮至揉焙入碾只俄頃湯嫩乳花浮香新舌
甘永初分翰林公豈數博士冷醉來不知惜悔許已向醒
重思朋友義果決在勇猛倏然乃以贈蠟囊收細梗吁嗟
茗與鞭二物誠不幸我貧事事無得之似贅瘦

江鄰幾暫來相見去後戲寄

低頭拜我蒼髯翁來如飛鳥去如風一夕共飲斗柄北平
明已向函關東衆中舊騎跛鼈馬塞下新買連錢驄疾驅
似逐鄧林日不宥暫住行何窮

和韓欽聖學士襄陽聞喜亭

亭欄下望漢江水淨綠無風寫鏡明日脚穿雲射洲影槎
頭擺子出潭聲檣帆落處遠鄉思砧杵動時歸客情使者
徘徊有佳興高吟不減謝宣城

覽顯忠上人詩

昔讀遠公傳頗聞高行僧廬山將欲雪瀑布結成冰尋蹟
數百載歷危千萬層師來笑賈島只解詠嘉陵

依韻和永叔嘗新茶雜言

自從陸羽生人間人間相學事春茶當時採摘未甚盛或

有高士燒竹煮泉爲世誇入山乘露掇嫩菁林下不畏虎
與蚺近年建安所出勝天下貴賤求呀呀東溪北苑供御
餘王家葉家長白芽造成小餅若帶銜鬪浮鬪色頂夷華
味久迴甘竟日在不比苦硬令舌宐此等莫與北俗道只
解白土和脂麻歐陽翰林最別識品第高下無欵斜晴明
開軒碾雪未衆客共賞皆稱嘉建安太守置書角青翦包
封來海涯清明纔過已到此正見洛陽人寄花兔毛紫蓋
自相稱清泉不必求蝦蟆石餅煎湯銀梗打粟粒鋪面人
驚嗟詩腸久饑不禁力一啜入腹鳴唧哇

次韻再和

建溪茗株成大樹頗殊楚越所種茶先春喊山摘白萼亦
異烏菁蜀客誇烹新鬪硬要咬蓋不同飲酒爭畫地從揉
至碾用盡力只取勝負相笑呀誰傳雙井與日鑄終是品
格稱草芽歐陽翰林百事得精妙官職况已登清華昔得
隴西大銅碾碾多歲久深且窳昨日寄來新鬪片包以籜
翦纏以麻唯能賸啜任腹冷幸免酩酊冠弁斜人言飲多
頭顛挑自欲清醒氣味嘉此病雖得優醉者醉來顛踣禍
莫涯不願清風生兩腋但願對竹兼對花還思退之在南
方嘗說稍稍能啗墓古之賢人尚若此我今貧陋休相嗟
公不遺舊許頻往何必絲管喧咬哇

送葛都官南歸

不羨新爲赤縣尹惟羨暫向江南歸江南纂纂梅雨時風
帆差差並鳥飛罾竿夾岸長若桅水籠畜魚鮮且肥家在
千山古溪上先應喜鵲噪門扉

永叔內翰見索謝公游嵩書感歎希深師魯子聰幾
道皆爲異物獨公與余二人在因作五言以叙之
昔在洛陽時共游銅駝陌尋花不見人前代公侯宅深堂
鏤塵埃空壁鬪蜥蜴楸陰布苔綠野蔓纏石碧池魚有偷
釣林鳥有巧射園隸見我來朱門暫開闢園婦見我還便
掃車馬跡何以掃馬跡實亦畏他客我輩唯適情一葉未
嘗摘他人或所至生菓不得惜又憶游嵩山勝趣無不索
各具一壺酒各蠟一雙屐登危相扶牽遇平相笑噓石搗
雲衣輕巖裂天窗窄上飲醒心泉高巔溜寒液下看峰牛
雨廣甸飛甘澤夜宿岳頂寺明月入戶白分吟露氣冷猛
酌面易赤明朝循歸途兩脛痛苦刺日汗就馬乘香車路
迫阨却望峻極居已與天外隔薄暮投少林漱濯整冠幘

碑觀巡幸僧指古定空壁誓將新詠章燈前五詆擿楊生
護已短一字不宥易明年移河陽簿書日堆積忽得謝公
書大夸遊覽劇自高歷石堂蘇花題洞額其文曰神清固
非人筆畫乃知二公貴逆告意可曠遂由龍門歸里堠環
數驛我時詩已答或歌或辨責責我不喜僧性實未所獲
凡今三十年纍塚拱松栢唯公與非才同在不同昔昔日
同少壯今且異肥瘠昔日同微祿今且異烜赫昔同騎破
韉今控銀轡革昔同自謳歌今執樂指百灰者誠可悲存
者獨窮厄但比灰者優貧存何所益

次韻和吳仲庶舍人送德化郭尉

蒲葉高帆十二幅秋風逆水滿檣開是時不畏浪頭起到
日定將船尾堆用舍東方言虎鼠賤疎梅福比蒿萊少年

才辨無如美廬岳峰前莫滯迴

和韻答永叔洗兒歌

夜夢有人衣帔蛻水邊授我黃龜兒生男前一夕夢仰看道士贈龜一枚星宿正離離玉魁東指生斗威明朝我婦忽在蓐乃生男子實秀眉自磨丹砂調白蜜辟惡辟邪無寶犀我慙暮年又舉息不可不令朋友知開封大尹憐最厚持酒作歌來慶之畫盆香水洗且喜老駒未必能千里盧仝一生常困窮亦有漆丁是其子

送余少卿知睦州

青山峽裏桐廬郡七里灘頭太守船雲霧未開藏宿鳥坡原將近見燒田養茶摘藥新春後種橘收包小雪前民事蕭條官政簡家書時問雪溪邊

田家

草木遶籬盛田園向郭斜去鋤南山豆歸灌東園瓜白水照茅屋清風生稻花前陂日已晚聒聒競鳴蛙

歐陽寺丞桐城宰

葉落淮南樹青山徧馬頭人煙將近郭松竹不知秋夜虎林嘯溪泉舍下流門前仲卿廟遺跡待君求朱邑家祠在焉餘姚陳寺丞

試邑來勾越風煙復上游江湖自迎客山月亦隨舟海貨

通閭市漁歌入縣樓絃琴無外事坐見蒲帆收

任適尉烏程

俛作程鄉尉折腰還自甘卞峰晴照黛雲水曉澄藍葑上春田闢蘆中走吏參到時蘋葉長柳暉蓋江南

夏日晚霽與崔子登周襄故城
兩脚收不盡斜陽半古城獨攜幽客步閒閱老農耕寶氣
無人發陰蟲入夜鳴余非避喧者坐愛遠風清

西湖閑望

夏景已多趣湖邊日更佳園葵雜紅紫岸柳自欹斜雨氣
收林表城陰接水涯愛閒輸白鳥盡日立汀沙

金山寺

并序

昔嘗聞謝紫微言金山之勝峰磴攢水上秀拔殊衆山
環以臺殿高下隨勢向使善工模畫不能盡其美初恨
未遊赴官吳興舩次瓜洲值海汝冬落孤港未通獨行
江際始見故所聞金山者與謝公之說無異也因借小
舟以往乃陟廻閣上上方歷絕頂以問山阿危亭曲軒

窮極山水之趣一草一木雖未萼發而或青或凋皆森
植可愛東小峰謂之鵝山有海鵝雄雌棲其上每歲生
雛羽翮旣成與之縱飛迷而後返有年矣惡禽猛鷲不
敢來茲以搏魚鳥其亦不取近山之物以爲食可義也
夫薄暮返舟寺僧乞詩強爲之句以應其請偶然而來
不得髣髴敢與前賢名迹耶

吳客獨來後楚橈歸夕曛山形無地接寺界與波分巢鷓
寧窺物馴鷗自作羣老僧忘歲月石上看江雲

舟中值雨裴刁二君相與見過

上滄淒淒天形接野低岸痕生舊水馬跡踏春泥風急
侵衣重山昏卷幔迷誰驚二客論不愧巨源妻

題刁經臣山居時已應辟西幙

向不樂郡府遂去歸田園結廬復種菘草樹日已繁散帙
理舊學了然無俗喧春雨一迴過覽耕登古原青山每自
愛霽色當衡門故人苟來往名宦未嘗言趣適已不淺道
心良亦存忽聞辟書至便令驅犢轅豈期同瓠瓜長繫蒿
萊根始知古君子出處惟義敦

依韻和武平九月十五日夜北樓望太湖

東吳臨海若看月上青冥河漢微分練星辰淡布螢細煙
沉遠水重露蔓空庭孤坐饒清興惟將影對形

寄西京通判宋次道學士

當時交友都無幾欲問歡娛亦異今花接上林新木變水
分清洛舊池深嗟峨嵋色雲常在窈窕宮牆草又侵脩竹
千竿白家寺昔年題處可能尋

送余中舍知漢州德陽

匹馬易爲秣單車長是輕秋風來後道宿雨度關城石上
樹林暗山根江水明桐花鳳何似歸日爲將行

郭之美忽至云往河北謁歐陽永叔沈子山

春風無行迹似與草木期高低新萌芽閉戶我未知忽聞
人扣門手把蟠桃枝問我此蟠桃緣何結子遲但笑不復
答問者當自推振衣向河朔河朔人偉期以茲不答意遲
子北歸時

樞澗晝夢

誰謂死無知每出輒來夢豈其憂在途似亦會相送初看
不異昔及寤始悲痛人間轉而非清魂歿猶共
靈樹鋪夕夢

晝夢同坐偶夕夢立我左自置五色絲色透縑囊過意在
畱補綴恐衣或綻破歿仍憂我身使存心得墮

夕發陽翟

我行陽翟道暮雨原上急麒麟冢相望霹靂碑下立農耕
傍山去鬼火迸林入莫問泉下人馬墮衣更濕

缺月

缺月來照屋角時西家狗吠東家疑夜淡精靈鬼物動僊
宰古莽無風吹

會勝院沃洲亭

前溪來洲後溪濶風吹細浪龍鱗活孤亭一入野氣淡松
上藤蘿籬上葛葛花葛蔓無斷時女蘿莫剪連古枝當年
吾叔讀書處夜夜濕螢來復去

題松林院

靜邃無塵地青熒續焰燈木魚傳飯鼓山衲見歸僧野色
寒多霧溪痕夜閣冰吾非謝康樂獨往亦何能

讀月石屏詩

余觀二人作詩論月石月在天石在山下安得石上有
月蹟至矣歐陽公知不可詰不竟述欲使來者默自釋蘇
子苦豪邁何用強引犀角蚌蛤巧斲析犀蛤動活有情想
石無情想已非的吾謂此石之蹟雖似月不能行天成紀
曆曾無纖毫光不若燈照夕徒爲頑璞一片圓溫潤又不
似圭璧乃有桂樹獨扶疎常娥玉兔了莫覓無此等物豈
可靈祇以爲屏安足惜吾嗟才薄不復詠略評二詩庶有
益

齊國大長公主挽詞

賢行聞當世尊隆異故常每令夫結友不爲子求郎夜月
初沉海姑星忽隕潢臨門親祖祭悲吹起修岡

重過瓜步山

魏武敗忘歸孤軍處山頂雖憐江上浦鑿巖山巔并豈是
欲勞兵防患在萌穎我昔常登臨徘徊愛晴景片雨西北
來風雷變俄頃疾行下危磴屢脫不及整霑濡入舟中幼
子喜抱頸問我適何之衣濕不太冷昨暮泊其陽月黑夜
正永鴈從沙際鳴旅枕自耿耿平明夾櫓去廟樹聳寒嶺
舉首生白雲飄搖水中影

秋日村行

谿霧晝又收山村夜初晦飢禽來往飛遠樹青紅碎原上

楚牛童屋頭吳婦碓雞肥酒已熟野老邀同輩

嗔

杳杳鐘初發昏昏戶閉時巢禽投樹盡疲馬入城遲醉唱
眠茅屋燒光透槿籬荷鋤休帶月亭長豎毛眉

直宿廣文舍下

前夜宿廣文葉響竹打雪昨夜宿廣文窻影竹照月賴此
數竿竹與我爲煖熱上有寒鵲棲拳足如瘦蕨平明欲飛
去喞喞若告說我無喜可報煩爾弄觜舌亦嘗苦老鷄鳴
噪每切切爲學本爲道窮蹙今素髮但能得酒飲終日自
兀兀

送唐紫微知蘇臺

洞庭五月水生寒盧橘楊梅已滿盤泰伯廟前看走馬闔

閣城下見驂鸞吳娃結束迎新守府吏趨騎拜上官曾過揚州能慣否劉郎蓋底勸須寬

送鮮于祕丞 倂通判黔州

壺頭山下俗巴婦曲中聽汲井熬鹽白燒田種穀青巖風來虎嘯江雨過龍腥事簡能談者楊雄所草經

此處有殘存文字，因損壞嚴重，難以辨認。依稀可見「壺頭山下」等字樣。

